

四庫全書

史部

欽定四庫全書

史部

江西通志卷

五十九  
六十

詳校官監察御史<sub>臣</sub>左周

檢討<sub>臣</sub>德生覆勘

總校官知縣

<sub>臣</sub>

楊懋珩

校對官典簿

<sub>臣</sub>

劉景岳

謄錄監生

<sub>臣</sub>

何銓

欽定四庫全書

江西通志卷五十九

名宦

南昌府

漢

梅福字子真九江壽春人為郡文學補南昌尉時成帝  
委任王鳳京兆尹王章以譏刺鳳死福上書不納居  
家常以讀書養性為事至元始中王莽專政福一朝

棄妻子去至今傳以為仙其後人有見福於會稽者

變姓名為吳市門卒云

漢書

李忠字仲都東萊黃人光武時為右大將軍建武二年

從平龐萌董憲等遷丹陽太守三公奏課為天下第

一遷豫章太守

後漢書

張躬永平中守豫章築東湖堤以通南路謂之南塘水

有所瀦人皆德之

林志

樂巴字叔元魏郡內黃人以荊州刺史李固薦徵拜議



郎使徐州還遷豫章太守郡土多山川鬼怪小人常破貲產以祈禱巴素有道術能役鬼神乃悉毀壞房祀翦理奸巫於是妖異自消百姓始頗為懼終皆安之

後漢書

陳蕃字仲舉汝南人舉孝廉除郎中出為豫章太守在郡不接賓客惟敬禮徐孺子特設一榻去則懸之後漢書徐穉傳

按陳蕃本傳無守豫章事見徐穉傳中又林志名

宦傳載後漢陳循為豫章太守惟徐孺子詣門待以殊禮考後漢書無陳循傳疑即修字之譌耳然

徐穉傳中亦無其事因附正於此

原跋

劉寵字祖榮東萊牟平人以明經舉孝廉除東平陵令以仁惠為吏民所愛母疾棄官去後四遷為豫章太

守

後漢書

陳修字奉遷烏傷人家貧為吏步擔上下恒食乾糧每至正臘僵卧不起同僚飲食虔請不一赴遷豫章太

守計月取俸受米不受錢十日一炊不燃官薪布被

覆體

南昌府志

華歆字子魚高唐人獻帝時拜豫章太守禮請徐孺子

為政清靜不煩吏民感而愛之

後漢書徐穉傳註

吳

孫賁字伯陽堅同產兄也領豫章太守在郡十一年卒

子鄰年九歲代領豫章在郡垂二十年討平叛賊政

績修理

吳書

顧邵字孝則吳人年二十七起家為豫章太守下車祀  
先賢徐孺子之墓優待其後禁淫祀非禮之祭者小  
吏姿質佳者輒令就學擇其先進擢置右職舉善以  
教風化大行

同上

太史慈字子義青州人劉表從子磐驍勇數為寇於父  
西安諸縣孫策於是分海昏建昌左右六縣以慈為  
建昌都尉治海昏並督諸將拒磐磐絕跡不復為寇  
孫權統事以慈能制磐遂委南方之事建安十一年

卒同上

謝景字叔發南陽宛人赤烏四年出為豫章太守在郡有治績於孺子墓前建思賢亭吏民稱之以為前有顧邵其次即景數年卒於官

同上

晉

孔冲會稽人為豫章太守明詩書易禮及孝經論語以授弟子東陽許孜比卒於郡孜聞訃奔赴疏食執役制服三年

晉書許孜傳

謝鯤字幼輿陳國陽夏人左將軍王敦引為長史敦將  
為逆謂鯤曰劉隗奸邪將危社稷吾欲除君側之惡  
何如對曰隗誠始禍然城狐社鼠也敦怒曰君庸才  
豈達大理出鯤為豫章太守莅政清肅百姓愛之

書

甘卓字季思丹陽人元帝初渡江授卓前鋒都督揚威  
將軍討周馥征杜弢屢戰多所擒獲以功拜豫章太  
守卓外柔內剛為政簡惠善於撫綏卒贈驃騎將軍

同上

王稜字文子少歷清官渡江為元帝丞相從事中郎從兄導以稜有政事宜守郡乃出為豫章太守加廣武將軍稜知從兄敦驕傲自負有罔上心日夕諫諍敦不能容潛使人害之

同上

庾條字幼序初辟太府宰累遷黃門郎豫章太守豫章黃韜自稱孝神皇帝臨川人李高為相聚黨數百人乘犢車衣皂袍攻郡縣條討平之卒官贈左將軍

同

上

殷羨字洪喬陳郡長平人為豫章太守都下人士因其  
致書者百餘函行次石頭皆投之水中曰沉者自沉  
浮者自浮殷洪喬不能為作致書郵其資性介立如  
此終於光祿勳

晉書殷浩傳

范甯字武子少篤學多所通覽為豫章太守在郡大設  
庠序遣人往交州采磬石以供學用改革舊志不拘  
常憲遠近至者千餘人資給衆費一出私祿并取郡



四姓子弟皆充學生課讀五經郡城先有六門甯悉  
改作重樓復更開二門合前為八同上

韓伯字康伯潁川長社人清和有思理留心文藝舅殷  
浩稱之曰康伯能自標置居然是出羣之器舉秀才  
徵佐著作郎並不就簡文帝居藩引為談客遷豫章  
太守入為侍中同上

孫潛字齊由盛子為豫章太守殷仲堪之討王國寶也  
潛時在郡仲堪逼以為諮議叅軍固辭不就以憂卒

晉書孫盛傳

劉盾字承盾東萊掖人王敦請為右司馬知敦有不臣  
心託疾不視事以是忤敦意出為豫章太守郡人莫  
鴻南土豪族因亂殺本縣令橫恣無道百姓患之盾  
至誅鴻及諸豪右界內肅然賜爵豐城子歷平南將  
軍

晉書

梅頤字仲真常有惠於陶侃後為豫章太守有事王丞  
相導遣收之侃曰天子富於春秋萬幾自諸侯出王

公既得錄陶公何為不可放乃遣人於江口奪之頤  
見侃拜侃止之頤曰梅仲真膝明日豈可復屈耶

世

說新語

張暢才思清敏志節貞勵秉心立操蚤有名譽除豫章

丞為陸機所薦詔拔用之

南昌府志

宋

蔡廓字子度考城人起家晉著作佐郎為太尉叅軍為

宋武帝所知出為豫章太守徵為吏部尚書

宋書

按南昌府志云漢張躬所築南塘後江水每於夏  
月溢塘而過多水害廓乃西起堤開塘為水門水  
盛則閉之內多則洩之自是居民少患

齊

王綸之字元章永明中歷位侍中出為豫章太守下車  
祭徐孺子許子將墓圖畫陳蕃華歆謝鯤像於郡堂

為政寬簡稱良二千石

南史

顧憲之字士思永明中為豫章內史在任清簡務存寬

惠有貞婦萬睇者少孀居無子事舅姑尤孝父母欲奪而嫁之誓死不許賜以束帛表其節義憲之累經宰郡資無擔石及歸環堵不免飢寒

同上

袁昂字千里陽夏人永明中出為豫章內史丁所生母憂去職以喪還江路風潮暴駭昂乃傅衣著柩誓同沉溺及風止餘船皆沒惟昂船獲全咸謂精誠所致

同上

梁

素君正字世忠昂之子早得時譽為豫章內史性不喜  
巫邪有師萬世榮稱道術為一郡巫長君正在郡小  
疾主簿熊岳薦之師云須疾者衣為信君正以所著  
襦與之事竟取襦云神將送與北斗君君正使檢諸  
身於衣裏獲之以為亂政即刑於市而焚神一郡無  
敢行巫遷吳郡太守

南史

張綰字孝卿大同五年由御史中丞出為豫章內史在  
郡述制旨禮記正言義四姓衣冠士子聽者常數百

人安城人劉敬宮挾妖道聚黨攻郡轉寇南康廬陵  
屠破縣邑有衆數萬進寇豫章新淦縣南中久不習  
兵革或勸綰避其鋒綰不從修城隍設戰備募敢勇  
士得萬餘人旬月間賊黨悉平復為御史中丞  
梁書  
邱仲孚字公信烏程人武帝初為山陰令號稱神明治  
天下第一累遷豫章內史在郡更勵清節卒年四十  
八喪將還豫章老幼號哭舉送車輪不得前贈給事

黃門侍郎

同上

伏暉字元曜武帝時為永陽內史在郡以清潔稱性儉素車服麤惡改豫章內史視事三年徵為給事黃門侍郎卒於郡徐勉志其墓曰東區南服愛結民胥相望伏闕繼軌奏書或卧其轍或攀其車或圖其像或式其廬思耿借冠曷以尚諸

同上

蕭勵字文約武帝從子除淮南太守以善政稱遷豫章內史道不拾遺男女異路徙廣州刺史去郡之日吏人悲泣數百里中舟乘填塞各齎糧食以送至新淦



縣所山有一老姥以盤擎鱖魚自送舟側奉上之童

兒數十人入水攀舟或歌或泣

南史

胡穎字方秀吳興人梁末陳霸先軍頓西昌以穎為巴

邱令鎮大臯督糧運下至豫章以穎監豫章郡霸先

率衆與王僧辯會白茅灣同討侯景以穎知留府事

承聖初元帝授穎羅州刺史尋除豫章內史入陳為

左衛將軍

同上

隋

豆盧通字平東昌黎徒河人弘厚有器局開皇初授大

都督遷洪州總管所在並稱寬惠卒官謚曰安

隋書

蘇孝慈扶風人仁壽初為洪州總管有惠政其後桂林

山越相聚為亂詔孝慈為行軍總管擊平之其年卒

官

同上

唐

吳兢汴州浚儀人少勵志方直寡諧當路薦直史館書

法簡核不少假借世人目為董狐坐貶荊州司馬以

史草自隨累遷洪州刺史表臧嘉猷劉春虛之里以

勵風俗

唐書

韓朝宗長安人開元中以山南東道採訪使坐所任吏  
擅賦役貶洪州刺史在郡乞罷貢梅煎以乳柑代之

天寶初召為京兆尹

林志

王遘天寶中為南昌令有中官過洪州求取無厭遘欲  
按之謀於權臯臯良久不答泣曰令何由致天子使  
而遽欲治之掩面去遘悔厚謝之

唐書權臯傳

南唐

馮儀為豐城令性廉明撫民有方有田父詣令求決事  
凌晨飯蕨稍飢至食肆求麪久不與乃去肆人堅索  
麪金不與訟於縣儀以茶飲之而灑桐油其中田夫  
盡吐所食惟蕨耳肆家乃伏罪

唐餘紀事

宋

何慈太平興國六年析南昌縣西境置新建縣首命慈  
為主簿領縣事慈擇地得南唐林仁肇故宅始創縣

治在任公恕民咸德之

林志

王明字如晦大名成安人宋師伐南唐明以黃州刺史江路巡檢率所部舟師破江南將朱令贇於小孤山擒令贇詔明安撫諸郡因命知洪州

宋史

按南昌府志稱明師入洪州或以城不即下當屠之明心謂不可謬與其衆約曰吾入城觀變爾等視吾鞭仆則加之戮否則勿殺一人比入舉鞭以示城於是獲全洪人圖祀其像於上藍精廬

樂崇吉字世昌開封人真宗時遷司農少卿知洪州有

司歲斂民財造舟崇吉至奏罷之

同上

唐肅字叔元錢唐人七歲能誦五經舉進士以工部郎中知洪州恬靜寡欲初至檣舟南康徘徊不進或問其故曰職由以四月為期今遽之得無獲趨利之議乎逾月乃至人皆愧服

府志

李虛己字公受父寅仕江南綽有清節國除留京師寅母獨在江南虛己以屯田員外郎通判洪州是時寅

與寅母俱無恙虛己雙輦迎侍臨東湖築第以居未  
幾進給事中知洪州真宗稱其醇雅循謹綽有能名  
宋史

葛源字宗聖麗水人仁宗時為洪州司理參軍有將官  
之甥與異母兄毆人實甥殺之將脅源曰兩人皆吾  
甥而殺人者兄也源不聽坐其弟

豫章書

陳良器仁宗時通判洪州值大水城不沒者十五吏民  
惶擾不知所為良器具薪藁不終日塞之闔城頌曰

無陳公吾屬魚矣

同上

趙槩字叔平虞城人舉進士知洪州城西南隅當大江之衝水歲為民患槩建石堤高丈五尺長二百丈明年夏水大至度與城平恃堤以全至於今賴之累官

太子少師致仕

東都事畧

按豫章書槩在洪州有僚吏鄭陶饒真挾持郡事為不法前守莫能制州之歸化卒皆故時羣盜真造飛語曰卒得廩米陳惡有怨言不更給善米且



生變槩不答卒有自容州戍逃歸而犯夜者斬之  
以徇因收陶真抵罪闔郡股栗

余靖字安道曲江人知新建縣著有遊西山記遷祕書  
丞數上書論事貶知饒州又謫監筠州酒稅慶厯中  
除右正言擢知制誥與范仲淹尹洙歐陽修稱為四  
賢又與歐陽修王素蔡襄號為四諫累官至工部尚  
書謚曰襄

宋史

張瓌字唐公洎之孫也知洪州營校督役苛急其徒三

百人將以夜殺之求不獲持鐻譟於門請易校壤召

問諭遣明日推治黠者十人不為易校

同上

張商英字天覺蜀州新津人知洪州興學校會歲澇開

東湖以洩水民無水患大觀中入為右僕射

同上

吳雄字慶錫長汀人紹聖間知靖安縣行勸民五事作

諭俗十詩自註孝經皆有闢風化者

豫章書

劉韜字仲偃建州崇安人紹聖間為豐城尉設方略勤

警捕鄉邑以清歲饑多盜他邑率以捕殺希賞韜曰

此飢民救死耳率豪右出穀賑濟躬自收恤多所全活後死於靖康之難

林志

楊告字道之其先綿竹人為豐城主簿邑有賊殺人投屍於江人知主名而畏不敢言告聞親往擒賊有言賊欲報怨者告不為動既而果乘夜欲刺告告又捕致於法境內肅然再調南劍州判官

宋史

王渙之字彥舟常山人未冠擢上第崇寧間知洪州淡泊自甘恬於仕進每云乘車常以顛墜處之乘舟常

以覆溺處之仕宦常以不遇處之則無事矣

同上

吳芾字明可仙居人舉進士累官知隆興府因其俗為寬猛吏莫容奸民懷惠利常曰視官物如己物視公事如私事與其得罪於百姓寧得罪於上官以龍圖閣直學士致仕自號湖山居士

同上

胡璉字宗偉建安人紹興間知豐城縣築堤捍江自是六鄉皆免水患采輯邑志祀王季友於學之東序以矜式多士

豫章書

周積建炎初知靖安縣慷慨有才略會金騎犯邑居民竄伏積呼集義兵屯據要地為保障計邑賴以全事聞特授宣教郎同上

江介乾道間知進賢縣歲饑會詔蠲半租介白部使者程大昌曰但減其半民尚未堪若自全戶三升以上悉與蠲則貧民被實惠矣常謂民饑而食之猶子飢而母乳之敢幸賞乎其實心撫恤如此

明一統志

程迥字可久應天寧陵人隆興進士知進賢縣議平反

以示教通糶糴以便民縣大水亡稻麥郡蠲租稅至薄迥白於府曰是驅民流徙耳賦不可得徒存欠籍乃悉蠲之境內有婦人傭身紡績舂簸以養其姑姑感婦孝每受食即以手加額仰天而祝之其子為人牧牛亦乾飯以餉祖母迥廉得之為記其事白於郡給以錢粟調信州上饒縣歲納租數萬石舊法加倍又取斛面米迥力止絕之迥居官臨之以莊政寬而明令簡而信綏強撫弱導以恩義積年讐訟一語解

去猾吏姦民皆感激浚悔暇則賓禮賢士陳說詩書

隱德潛善皆表而出之以勵風俗

宋史

陳敏識建炎中知分寧縣金騎至江右牧守望風避去  
敏識獨抗義斬馘期與民死守縣境卒全宣撫使張  
浚請陞縣為義寧軍擢敏識就知軍事奏至不行後

子栻為文誌其事

明一統志

楊長孺淳熙間知南昌縣前宰多控制不下長孺處之  
裕如也常曰畏事生於不更事更事則不畏事矣三

年之間繭絲保障各得其所 同上

留正字仲至泉州永春人紹興進士知贛州奏蠲上供米不報及為相蠲一萬八千石知興隆府進龍圖閣

直學士 宋史

沈雲舉乾道間知奉新縣有善政置沃壤以養士蠲圭稅以修陂直分屍之獄雪白骨之冤政以最聞邑民德之立祠於學 林志

張仲方字萬春金華人淳熙時知隆興府大旱禱雨審



獄活囚人稱異政仲方見國事日非歎曰滿朝皆婦人但知和議謂不共戴天之讐何具疏言恢復大計不報遂解印綬隱南昌之松亭里

豫章書

高南壽淳熙間知奉新縣歲旱禱雨祝曰願減十年壽乞為三日霖朱子守南康曰使吾屬皆如高令尹吾何憂乎民賴以全活者甚衆為之立祠

林志

王居安字資道黃巖人淳熙進士知隆興府初盜起郴黑風峒羅世傳為之倡勢張甚湖南所在發兵扼要

衝賊乏食少懈主兵者稍堅持之則就擒矣會江西  
帥欲以買降為功遣人間道說賊餽鹽與糧賊喜謀  
益逞放兵四劫江西列城皆震動朝廷憂之遂以居  
安為帥居安致書於都統制許俊曰賊勝則民皆為  
賊官軍勝則賊皆為民勢之翕張決於此舉乃督戰  
於黃山勝之賊走韶州為推鋒軍所敗賊勢日蹙密  
為方略羣盜次第平居安之在軍中也賞厚罰明將  
吏盡力始終用以賊擊賊之策故兵民無傷江西人

祠而祝之刻石紀功

宋史

張瑄慶元中知奉新縣為民減營田之賦上之州不可其請益堅孤憤不勝欲解印綬去邑人王模舉幡率衆以留之曰寧存民病勿失賢宰今不得請後有賢帥與令宰意合必得之矣未幾龍圖張杓來帥豫章瑄又請從之民相賀曰微張君不能爭吾民難爭之賦政聲由是大著

豫章書

楊方字子直長汀人嘗從朱晦菴學任武寧丞文雅雍

容廉靜平易人皆化之先是學租每為司計者所乾  
沒方至量其出入積贏以辦祭器轉靖安知縣

同上

按縣志作楊芳自題詩有云堂上官人似野人村  
人相見且相親又云高陂約水歸田急不管灘聲  
入縣門其風致可想

程璠字仲韞河南人知豐城縣適江水環城大饑邑豪  
吳某閉糴璠召諭不從謂曰民饑且死當杖汝以取  
之吳懼如命於是富人爭出米民用以濟璠資識高

奕凡山川道途人物名氏一經聞見歷歲不忘為邑  
三年識其民且半矣

明一統志

真德秀字景先浦城人嘉定間知隆興府承寬弛之後  
乃稍濟以嚴尤留意軍政欲分鄂州軍屯武昌及通  
廣鹽於贛與南安以彌汀贛鹽寇未及行值母喪歸  
明年蘄黃失守盜起南安討之數載始平人服德秀  
先見

宋史

王正邦字榮甫明州人善詩尚氣節不苟取與淳熙間

知奉新縣為政有操縱事至而應無成心賑窮乏時  
婚姻恤死喪援孤苦皆盡誠為之

安志

樓大年字元齡義烏人少從朱子門人徐僑游長於性  
命之學襟度洒落一塵不染登嘉定癸未進士知隆  
興府南昌縣治先教化建利去病洞察民隱有殺其  
讎者賂給其甥就辟甥自陳殺人狀甚悉大年疑之  
縣丞與府錄事受賕使焚屍以滅跡大年正色抗辯  
上之憲臺推官重讞事始白民敬之生為立祠及去

攀轅留者綿十餘里遷奉議郎通判吉州提點刑獄  
李迪以大年廉慎命錄一道滯囚未幾攝郡事江東  
大姓查氏據幼弟貲產六十萬爭訴二十年不解大  
年舉張詠決子壻爭財故事命歸其弟人以為允歲  
終吏白公帑錢粟羨餘前官例納大年斥之以助軍  
餉及周宗室之貧者尋陞朝奉郎卒官年七十

宋文

憲集

宋潛溪曰濂嘗過竹山問大年子孫無恙獲拜其

遺像癯然一儒者爾而其剛烈之氣則常伸於萬物之上人果可以貌取之哉大年受學徐僑與聞濂洛關閩之學其所養充矣此所以負然獨異也學之所繫於人者有如是哉

劉卿月字昇叟合沙人淳祐間知豐城縣褪身介潔其治以辨名分尚禮義謹教化為先務修城浚濠建社廣學百廢具舉又築濱江堤五百丈至今賴之

書

豫章



蔡塾開慶中知靖安縣元兵入境或勸之少避塾曰豈可忘君以避難哉竭力守城一方賴之同上

任滄景定初知分寧縣北兵蹂江右諸縣繼而諸寇紛起滄與民效死寇去捐月俸節浮費興復一新邑人德之同上

元

綽和爾回回人豐城縣達魯噶齊明恕廉介為政有方嘗有郭招討軍舟行過境死於盜省路委官出捕欲

盡屠瀕江民綽和爾曰吾已檢覆知為河寇於民何  
與乃直前辯白謂不得請則將入奏郭乃斂兵去邑  
四面皆水連歲增修堤防又築墻數百丈民不告匱  
戶口日增興學崇化政教益新

豫章書

賈全甄城人至元十二年克宋隆興府豐城民懼而徙  
者十九井里蕭然明年授全豐城尹為政一本仁恕  
安慰撫摩民以還定未幾盜發臨江撫州越境驅掠  
全單騎往救幾瀕於危北師過境上哨騎橫出全百

方調護居者安堵省徭役興學校復還太平之觀後  
士民相率建祠記頌德政

同上

完顏璧河陽人大德間為進賢縣尹廉明公恕愷悌愛  
人嘗以輸賦稽緩受府笞璧恐民聞而懼也反召耆  
老而慰安之民益感激爭先輸納惟恐為賢令累賦

畢登

縣志

布呼齊回回人為進賢縣達嚕嚕齊十年吏畏民懷始  
終如一他州縣事不能決者憲府時委之著能名沒

於官

同上

陳元凱字時舉河東人以行省郎中為富州尹立紀綱以新民聽先教化而後刑罰經理學宮改鑄祭器公退即詣學訓勉諸生從遺老講求民瘼訪政治得失而興除之一時民譽翕然

豫章書

劉寀字君疇至元間以宜黃丞奉檄攝龍興庾受米平斗略無取於民參政胡漢卿時方為寧州判官率其民以賦上民無羨費吏無苛苦甚異之及尹新昌漢

卿為參政待之甚厚寀居劇縣決訟如流上下莫敢

易之

林志

圖烈圖字仁卿蒙古人元貞間為進賢令威以攝吏德  
以懷民常修陂墻八百餘所民甚利之

同上

高復禮字仁卿河南人為富州尹到官屏謝干謁門庭間  
然一蒼頭給事而已臨政出言不易公退閉戶讀書  
澹泊自持饘粥外無異味始終如一卒於官

豫章書

阿爾威河西人大德初授武略將軍富州達魯噶齊州

境歲受水患馬湖墻衝決損田四十頃阿爾威至築堤  
三百丈又修境內壞堤六十四處水復故道歲遂有

秋

林志

陳世榮字顯卿莘縣人泰定中為進賢尹興學校正民  
俗常曰民雖可殘而天不可誣也幹辦公事悉出措  
置不擾於民時歲饑預為儲蓄活數千人以老致仕  
民不聽其去為築室南郭以留之

豫章書

潮海扎拉岱氏靖安縣達魯噶齊至正十二年斡黃賊

起潮海與縣尹黃紹同集義兵為禦賊計未幾賊兵  
數萬由武寧來寇紹赴行省求援潮海獨率眾與戰  
於象湖大破之乃起進士胡斗元塗淵舒慶遠甘棠  
等謀畫而以勇士黃雲為前鋒自二月至八月戰屢  
捷而賊黨益盛黃雲戰死我軍挫衄潮海遂被圍尋  
為賊所執殺於富州子民安圖襲父職為達魯噶齊  
十三年率眾敗賊將復縣治十四年賊兵復至民安  
圖迎戰力竭賊執而曷之

元史

楊宗訓字源清洛陽人以蔭授寧州判為政廉明民甚德之至正壬辰永興武寧寇數千人入境宗訓率義士吳德文祝興可等與賊拒戰俘馘甚多既至清溪賊設伏力戰不支宗訓為賊所殺德文等亦被擒死之林志

特穆爾色目人武寧縣達魯噶齊至正壬辰土寇張普憲率賊衆寇縣境特穆爾謂主簿楚彥曰我等受國家恩委身報效此其時也於是募義士與賊力戰於



縣東死之

同上

張昇建陽人以神童舉入胄監官至江西儒學提舉至正間陳友諒據豫章逼取諸司印綬昇曰誰能苟生辱名投印井中不食死

福建通志

明

葉琛字景淵麗水人博學有才藻以薦徵至金陵授營田司僉事尋遷洪都知府佐鄧愈鎮守降將祝宗康泰復反琛被執不屈死之追封南陽郡侯塑像耿再

成祠後祀功臣廟明末追諡貞肅

白志

按前志有張子明傳子明忠節應入撫州人物今

改定

趙文奎洪武初知南昌府莅事嚴毅措置有方凡百興  
作民不知勞而事已畢去後民思慕之

明一統志

許方寧波人洪武三年知南昌府盡心民事尤惓惓學  
校常夢一儒者曰吾廬冒風雨久矣冀太守修之莫  
詳所以及謁徐孺子亭觀其像如所夢遂加葺焉

豫

章書

但元行安陸州人洪武初任武寧知縣開荒田興水利  
建公署惠蹟甚多繼任者錢唐盛文郁益拓元行之  
業以文學政事名

同上

史彬字文質獲鹿人元進士明初由戶部郎中調富州  
吏目值流民嘯聚彬設方略贊知州強立擒斬招降  
衆遂潰民獲安全修學校築堤墻勤敏公惠卒於官  
遂家焉孫安禮部郎中死交趾之難

同上

朱宗晦華亭人洪武間知靖安縣愛民禮士潔己奉公

修壇壝興學校治橋道勸農桑綽有政聲

明一統志

林弼字唐臣一字元凱龍溪人洪武初知豐城縣以文

學飭政事士高其行民懷其惠時方之卓魯坐誣誤

逮至京獄中上書詔釋之復為考功郎中

豫章書

秦泰洪武中任南昌知縣勤於撫字民有不率者以五

教諭之延禮儒生刑清政簡去任父老攀留之

明一

統志

梁璧洪武初知進賢縣事廉明果斷囹圄空虛吏畏民懷相與立清政坊於邑前稱頌不忘

同上

何昭善字憲章淳安人洪武間舉孝廉授豐城縣丞營公解興學舍治橋梁築堤墻經畫之績最多陞奉新知縣

豫章書

劉綱字之紀禹州人建文進士寧州知州凡居寧三十四年仁宗常賜酒饌人以為榮正統中請老去民送之涕泣載道及卒寧民祀之狄仁傑祠中其孫即大

學士字也

南昌府志

按明初寧縣至弘治始改寧州建文時未應稱州  
周秩字公弔安鄉人宣德鄉舉任南昌府學教授文行  
為時推重學徒例有公費秩畜之帑至五百餘金悉  
以造櫺星門甃學牆樹泮宮坊提學夏寅屬秩衡文  
高下悉當卒於官士子痛之

豫章書

璩鎮海常山人宣德間奉新知縣莅政廉勤鋤強植弱  
歲饑賑濟有方縣學田畝科米一石七升租重民困

奏蠲十之二民咸德之同上

王來字原之慈谿人宣德二年以會試乙榜授新建縣學教諭上疏言寧府每祭祀取郡邑諸生備樂舞演習經旬有妨學業宜以附近羽流充之不足則用護衛軍餘子弟禮部覆奏如議頒各王府著為例設樂舞生自此始用薦擢御史巡按蘇松常鎮四府累官至南京兵部尚書

南昌府志

胡本惠銅陵人永樂鄉舉授戶部主事正統間擢南昌

知府篤實有才愛民如子剖紛摘伏策應裕如郡人  
鍾甬儒行特高本惠致之郡齋薦為本學訓導居常  
衣無重襲食無兼味滿去不攜南昌一物歷官右副

都御史巡撫遼東

府志

劉琛沔陽州人正統六年由進士知寧縣嚴厲有威遇  
事果斷聽訟能得民情吏不能欺境內肅然

林志

陳純字希文寧夏籍錢唐人由舉人正統間知奉新縣

有惠政吏部以聞特賜楮幣樽酒

明一統志



張冲字弘謙龍巖人正統間任進賢縣廉明強幹禮士  
愛民重名器抑僥倖創學宮築城垣增圖籍置義倉  
撫民如子時有瑞蓮靈芝野蠶成繭之異秩滿奏留  
復任又九年卒於官百姓巷哭祠之

進賢志

尚祔字景福羅山人正統進士擢御史以言事調豐城  
知縣剛毅敢為不畏權勢時鎮守太監假進獻名需  
擾郡邑民不堪命獨畏祔風采無擾焉後陞廣東僉  
事

豫章書

李廷聰益陽人以景泰鄉舉任豐城知縣有治才會洪  
水衝堤幾盡勸募材力採石興工委主簿黃璫董其  
役璫用塞張秋口法督率人夫各執旗號整齊不亂  
卒成堅堤廷聰在任半面輒知其人呼姓名無一謬  
者

豫章書

聊讓字公遜蘭溪人景泰進士天順中知南昌縣政主  
愛民守禮執法不徇上官意指時鎮守中官恃恩恣  
橫有所苛取讓即納冠帶求去中官愧而留之自是

不敢有加於讓民尤席其庇焉

同上

張翥字汝振長洲人天順進士成化間知南昌府性剛鯁以名節自許達於吏事剖決如流中官王慶怙勢索取珍玩翥峻拒之一無所與臨行挾翥上舟挫辱之民號擁登舟奪翥以歸陞廣東參政終雲南按察使

安志

呂聲字廷和桐廬人由進士天順間知進賢縣敏捷有才幹凡所修舉功能立就邑常多疫聲翦爪齋沐禱

上帝七晝夜不少急疫勢隨息明年疫復作聲又齋  
禱請身代死疫又止人咸感之

明一統志

按進賢縣志聲作古選以訓蒙作嫁女歌以訓俗  
建社學數十區間左災聲稽顙風反火息虎為患  
禱於神羣虎伏誅陞太僕丞

黃寓字世用閩縣人成化進士除武寧知縣廉明古樸  
撫字盡心民有鈎致流屍折其脅骨誣為仇家所毆  
問官久不能辨寓視之曰骨為毆傷何以從內折外

耶誣者遂服時有冰鑑之謠陞戶部主事

豫章書

祝瀚字惟容山陰人成化進士歷刑部郎中弘治間擢  
南昌知府戴星視事廉明有威時京奏臺訴者株連  
至千百人瀚一切不問惟對面纏繫之相去徑寸寢  
息甚艱未幾日多自解息園土一空出公費墾田二  
萬畝以贍諸生築圩五百餘處俾圩長督之至今名  
祝公堤又修郡乘移郡獄擴郡治基政成有靈鵲巢  
梁馴鴈隨車之異時宸濠勢漸熾瀚每裁抑之寧府

有鶴帶牌者縱於道為民家犬所噬王官希意牒府抵罪瀚批其牒曰鶴雖帶牌犬不識字禽獸相爭何預人事濠卒不得逞後以中傷罷去民為立祠

安志

吳昂字德翼海鹽人弘治進士授宣城知縣調繁新建時宸濠勢張索租刻甚民弗堪遂結寨丁家山拒之宸濠曰新建民反諸大吏莫敢言昂獨以民有激而然不可以反名乃請於濠曰民田廬妻子不保勢極而生變此不可以威力驅濠領之乃單騎入山諭以

禍福民皆解散歲饑昂設法賑之全活無算尋陞刑部主事歷官福建右布政使

同上

鄭璵字信卿南京驍騎衛人弘治進士授新喻令以循良被徵遷刑部主事歷郎中出知南昌府始至宸濠氣焰薰灼璵獨不附歲時宴遺一無所與其羣小不法輒問遣凡百需索峻拒之濠積恨既深遂誣奏下獄煅煉瀕死及變作猶械繫於舟璵乘間脫身登岸以所獲馬奔獻都御史王守仁守仁慰勞之委以原

職守城因備陳賊情後擢河東鹽運使

府志

李承勛字立卿嘉魚人弘治進士由太湖知縣歷郎中  
遷南昌知府正德六年贛州賊犯新淦執參政趙士  
賢靖安賊據越王嶺瑪瑙崖華林賊又陷瑞州諸道  
兵不敢前承勛督民兵勦數有功華林賊殺副使周  
憲憲軍大潰承勛單騎入憲營衆乃復集都御史陳  
金即檄承勛討之賊黨王奇聽撫搜得其衷刃縱使  
還奇感泣誓以死報承勛命奇密入寨說降其黨俾



從中應而親率所部登山奇夜拔柵官軍奮前擊降者自內出賊遂潰華林賊平鎮守中貴黎安誣承勛擅易賊首王浩八獄詞坐下吏大理卿燕忠即訊得白舉治行卓異超遷浙江按察使仕至兵部尚書卒

謚康惠

白志

劉璲字士約麻城人弘治進士授豐城知縣臨政嚴明庭無私謁凡民間均徭徵銀明載數目印帖給小民令依期執帖以輸吏不能侵邑有給引錢前令俱入

私索璫悉貯公用修築河堤卒於官人咸惜之

豐城

志

毛騃字汝健應城人由鄉舉正德間任武寧知縣有治  
才行已尤慎暇即儒學以經義授諸生時民俗樸野  
乃刻四禮圖及註陸士衡兄弟論以為勸又出俸餘  
市銅以鑄祭器士民稱之

豫章書

吳嘉聰字惟德山西振武衛人正德進士除豐城知縣  
度弘而才敏建昌寇徐九齡屯據醴源嘉聰奉檄夾

勦先登破袋嶺擒賊首顏曰和等築縣城後宸濠變起賴為保障累遷南昌知府承己卯變後株連從逆甚多囹圄皆滿乃創新監以繫輕典者日夕窮訊豁無辜者千計尤注意學校有作人之功陞按察副使府志

孫璋字希學鄞人正德進士除南昌知縣立身以介應事以和值宸濠勢張政多掣肘璋維持調護之邑濱江田多沙塞入覲時疏減沙米之賦以甦民困擢御

史豫章書

張汝舟字濟民崑山人成化鄉舉弘治間任南昌府同知剛正廉明上下信服修忠臣廟表高士墓以激忠清之風毀淫祠鞭妖鬼以正幻妄之俗巨寇徐九齡猖獗率衆往捕為寇所遮部下民兵熊玉金挺身代死汝舟得脫擢知思南府

同上

汪穎字秀夫江陵人弘治鄉舉任南昌府通判練達政體曉暢軍事攝奉新縣均徭役革誅求民戴之若父

母正德壬申從周憲戰於華林憲遇難穎亦被創力  
戰事聞陞本府同知以兵夾擊建昌賊徐九齡敘功

第一擢九江知府

同上

羅輅字質甫江寧人正德進士授中書舍人疏乞就養  
抵家父卒服闋擢袁州知府都御史王守仁薦其才  
改贛州復以都御史盛應期薦又改南昌聞母病竟  
棄官歸久之復補南昌勸課農桑巡行勞來靡不周  
至聽斷明恕南昌號大治擢按察司副使以思母乞

休還家五月而母卒仕至大理寺少卿

府志

方印字欽佩南昌衛指揮使正德庚午饒州桃源洞寇起印奉檄督兵戰於畚塘俘斬有功尋與寇遇梁山坂力戰不克被執死之詔祀萬年縣錄後加襲一級後以子恩任署都督僉事贈印如其官

豫章書

牛鸞字鳴世獻縣人進士由山東僉事左遷知寧州才識明敏剗削夙弊境內晏然尤善鞠獄不假筭楚而情偽立辨囹圄空虛當道移文事或有非便者抗論

不屈卒如所請乃已時鎮守中官怙寵暴橫誅求斑竹野味諸物州民洶洶驚叱縛其人致鎮守府且寄聲曰吾不憚面君以救此一方民矣中官雅識其名事竟寢擢太原府同知歷山東按察副使

同上

萬士賢南海人弘治鄉舉正德間任靖安知縣瑪瑙崖之變士賢鑄兵器訓戰士築城鑿池建敵樓佐知府李承勛討平巨寇後宸濠反遣宋祥四涂景七募召瑪瑙餘黨士賢執祥四等斬以定衆志兵燹之後勦

捕寇黨撫恤瘡痍省刑節用建射圃立社學文教聿興民至今稱之

同上

姚永楨字文瑞華亭人由鄉舉任進賢縣值歲荒流盜劫鄉坊永楨率民兵保障東關賊不敢犯後臺司遣將征勦調度軍用而民不擾閭帥誅求自甘窘辱而不忍傷民卒於官士民思之

明一統志

王紀字理卿泰州人正德進士知進賢縣邑舊無城庚午盜起郡縣雲擾紀相址築之又建鍾陵書院祀周



濂溪置院租并餽守者學使李夢陽記之尋平桃源賊有功擢南工科給事中歷官陝西僉事

進賢志

劉源清字汝澄東平人正德進士授進賢知縣宸濠反源清積薪環室命家人曰事急火吾家一僕逸手刃以殉縣中諸惡少與賊通者悉杖殺之宸濠妃弟妻伯歸上饒募兵源清邀戮之賊檄至立斬其使會餘干知縣馬津龍津驛丞孫天祐亦起兵拒賊遂不敢東嚮賊平擢監察御史嘉靖十年以兵部左侍郎總

督宣大軍務 白志

劉守緒字克承興國州人正德進士除奉新知縣嚴明  
正大不以辭色假人平租徭理獄訟政簡而民帖然  
己卯之變起兵赴義以都御史王守仁檄出間道夜  
襲濠伏兵於新舊墳廠破之遂復省城論功歷陞至

太僕卿 豫章書

何永清字原清潯州人一云開封人國學生正德間為  
奉新縣丞廉勤剛直遇事勇為時華林寇起營城隍

治武備從事兵間者數年後與子冲霄從副使周憲  
攻寇於華林冲霄力戰死之永清亦以勞瘁致疾卒  
蕭然無以為斂喪還傾縣為之哭送

同上

顧泌字民表成都人正德進士宰豐城存心仁恕莅政  
嚴明積粟至數萬石頻年水旱泌發廩減價以糶秋  
成糴還民賴以濟寧藩需索悉禁絕之及反欲加兵  
於豐即緝斬從逆者四十八人以徇極力備禦境賴  
以安首發其變於虔撫王守仁率兵從討有功陞大

理寺丞

同上

韓弼字汝良平湖籍餘姚人嘉靖進士除豐城知縣明  
察威嚴政多奇績知南昌府閩廣流寇將逼境亟議  
城豐躬自相度慰藉士民財不督而輸力不驅而集  
三閱月工竣寇警恃以無虞擢江西提學副使

同上

按豐城縣志弼令豐時有醉人入酒肆遺金醒忘  
其處詣告訊曰此無頭事誰命汝來曰禱神得筊  
一陽三聖即批拘酒戶楊勝三入審一訊得金稱

神明焉

謝存儒字懋修蒲圻人嘉靖進士由禮部郎中出知南昌府精於吏事以廉敏為僚屬先鞠獄務得情久之洞悉謠俗方言雖髡獨童孺得自陳所患苦郡大治陞雲南按察副使歷兵部右侍郎

同上

譙孟龍字乾甫南充人嘉靖進士知南昌府城西南茅園楓樹當章貢盱汝諸水之衝洪潦暴至汪洋一壑孟龍糾衆築堤躬自勸役障民居五千餘家田數萬

畝至今名曰譙堤加意校士以故癸卯歲一郡得人最多陞雲南按察副使

同上

王天性字則衷揭陽人嘉靖鄉舉任南昌府通判質直疏豁有幹才署豐城縣城東濱江平豐墻壞天性相度水勢移築馬湖內堤躬寢食於堤上民期會訟獄者皆往赴焉堤成至今賴之

同上

陳世輔字汝鄰定遠人嘉靖進士除南昌知縣溫厚慈祥視民如子嘗有兄弟爭財者世輔且諭且泣兄弟

二人竟以田相讓庭無滯案治為先後南昌之最同  
上

邵梗字良用仁和人嘉靖進士除南昌知縣勤敏蒞政  
令兩吏讀民辭且聽且剖略無違失時邑宦熊恭肅  
有掌院之命梗往拜分庭抗禮不少遜恭肅益以此  
高之及離任民涕泣追送江干不忍別

劉應峰字紹衡茶陵人嘉靖進士除南昌知縣縣當省  
會事難綜核應峰以鎮靜處之不以為勞均丁糧以

僉差役省工食以覈兵機開十限以定追徵均鋪行以蘇偏累革民船而省差擾政績為一時最陞吏部

主事

豫章書

周崑字孟登崇德人嘉靖進士授玉山知縣調進賢溫醇簡重威惠並行邑有盜魁踪詭崑偽出遊抵鄉捕得數其罪即杖殺之人服其神明擢刑科都給事中

同上

周美字濟叔崑山人嘉靖進士除進賢知縣縣多逋賦



美每歲春月一切緩征民感其惠賦亦不逋出贖鍰以賑饑建社倉以備歉捐薪俸以修學上計至不能備行李遷刑部主事歷官四川按察副使

同上

王修易江山人由歲貢嘉靖間任新建縣學訓導終日對諸生講解貧者輒周卹之故與巡撫山陰張元沖為同門友一日遣人召見修易曰為公事乎為講學乎講學當以折衷相命即公事明日趨謁張建之如禮延請乃赴

同上

殷士望字德甫丹徒人嘉靖間倭寇縛其父大經將刃之士望詣賊請以身代賊為感動兩釋之督學秦聞遂以附生充貢任新建教諭拳拳講學捐俸修尚友堂買書貯學舍操履尺寸不踰陞衢州教授

同上

商大節字孟堅鍾祥人嘉靖進士授豐城知縣捕境內盜幾盡擢兵科給事中累官巡撫

白志

湯聘尹字國衡長洲人隆慶進士授進賢知縣邑糧差先析為二糧輸於官差則隨事分派於民富者破產

貧者廢業聘尹至奉行一條鞭法百姓戴之賑饑修

學雅多善政焉

進賢志

石漢汝陽人由鄉舉萬厯間知寧州才識通達殲盜魁

李大鑾議創銅鼓營守備地方賴之擢按察僉事

豫

章書

東漢字希節華州人舉人為南昌知府鎮守黎監怙勢

張威誅索無忌獨不能干知府會錦衣使者至意有

所干黎黨聞之曰姑且止東太守剛直不可犯也歲

大饑出粟賑之他郡率來就食不為禁曰均吾民奈何分彼此耶活者數萬遷長蘆鹽運司使致仕

陝西

通志

潘穎字叔愚寧海人嘉靖進士出宰豐城性通敏剛決案牘所積如山一日盡與剖決堂下無稱寃者修葺學宮疏濬河道剔奸釐弊頌聲載道擢陞南京稽勲司主事兼攝四司黜陟惟允辛卯特旨宣見奇其奏對超擢郎中未幾卒

浙江通志

吳大本字性夫宣城人進士知進賢縣有儀賓李貴怙勢橫暴以私逋殺人論治之賢聲遂起擢河南道御

史

江南通志

劉守嵩字景仁興國州人嘉靖舉人授儀隴令移攝大竹以廉能最遷南昌府同知兩邑爭留之不可各立祠以祀南昌有熊生者為嚴嵩戚憑勢侵鄉人田羣愬諸上有司莫敢問守嵩召至正色叱命鞭之悉還所侵田竟納綬去

湖廣通志

程光甸字子極太湖人嘉靖進士任進賢令值歲旱民饑旬移家穀千石以賑之又為地方奏請建城卒士

民祠祀之

江南通志

金應徵長洲人嘉靖進士令奉新邑傍山無城應徵捐貲築之後土寇竊發賴以保全歷陞贛南兵備終雲

南叅政

同上

陸文博平湖人太學生為豐城縣丞嘗督運采石中夜船忽漏博具衣冠拜祝曰船中有一錢非法者請身

葬江魚比曉啟視則水草纏裹三魚塞漏處豐士大夫有三紀異以傳之七世孫龍其康熙中進士為廉

吏理學名儒

浙江通志

張棟字伯任崑山人萬厯進士授新建縣令時清丈議起躬臨相視寒暑不避辛苦所定則例為邑永利擢

工科給事中

江南通志

張昌辰字漢明號對文臨海人為諸生二十年以善治春秋名萬厯癸卯鄉薦至癸丑捷南宮除豐城令豐

城為洪都下邑世族巨宦播虐細民昌辰下車廉得  
尚書某者侵民舍旁隙地僉憲某者斂債入民子女  
即詣撫按具白其事下昌辰勘問據律定案諸貴俛  
首無辭豪右為之斂跡

浙江通志

范涑字原易休寧人萬厯中知南昌府歲大侵人啖草  
木根節原垸一空涑請於監司發儲糈躬視民窮瘠  
散給郊內外增竈設粥民得以哺病有藥斃有瘞遠  
地不能轉餉者必躬親賑同民緩急飢飽郡歲三大



饑涿所存活數十萬家舉義倉弛河禁修圩堤掩積  
豁濬城池通津梁興種植省縣役減驛遞在官五年  
以民為命民亦倚涿為身以忤兩臺左遷去父老謳  
思流涕乃建祠祀焉

萬國欽遺愛祠記

按范涿先為南城令有治行前志俱入建昌名宦  
然守南昌政績尤著今改入南昌

林道楠字廷任莆田人萬歷進士除進賢知縣強直端  
謹歲饑發粟乘小艇徧歷窮村計口賑給每春假犢

散種以惠平民繕學宮復社學築官圩一切出自區  
畫會丈田躬自履畝分則定賦雖貴勢不少徇人尤  
德之召為御史擢太僕少卿

豫章書

朱大啟字君興秀水人萬厯進士授南昌推官郡方缺  
守即委署有徽商殺人法當抵以要路請託撫軍發  
縣審釋大啟覆招時竟置之法臨江有大姓獄數年  
不決片言定之永寧為吉安支縣前司理皆不臨其  
地大啟至釐其積弊清倉穀千石崇禎間以太僕寺

卿催餉江右疏奏江右貧瘠正額且不支乞免額外  
搜刮人尤感之歷官刑部左侍郎

嘉興府志

湯北京字伯閎宜興人萬歷進士除豐城知縣興學弭  
盜摘發如神著有仁政錄士民立祠東關外祀之

豐

城志

徐揚先字南高江寧人萬歷進士授萬安縣調豐城獄  
訟立剖尤加意馬湖熊坊諸堤至今利賴豐賦重役  
繁胥吏為奸揚先搜剔一清民無逋負之累奏最擢

御史累官太僕卿

同上

馬鳴起字思劬龍溪人萬厯進士授新建知縣性端凝持大體極意恤民萬厯甲寅歲大荒鳴起設法賑濟飢民賴以全活未幾擢御史終戶部尚書

新建志

王亮字茂弘臨海人萬厯進士授進賢知縣強項有氣岸奉檄清丈土田事凌雜易於為奸亮約束簡便令民自占實而期以一日攜飯糗偕里正履畝丈之小民不擾於供億而豪猾亦無所庸其奸焉

進賢志

張伯祥鄞縣人爲靖安令嚴毅方正不苟言笑莅政清  
勤折獄惟公每至夜分而退諄諄然以敦本善俗爲  
事著省民條約一冊使家傳戶誦其大綱有四嚴之  
在官者曰謹內肅外約之在民者曰正俗興利綱各  
有目總四十七章又以民俗疾病好事鬼神死喪作  
佛事安葬泥年月特著淫祀擇葬醫藥三辨名曰條  
約發揮鑄梓並行瑞州新昌胡雪二盜馬下獄有求  
釋之者伯祥不可曰我欲死之諸君欲生之爲靖安

害必斯人也後雪二果聚黨馬腦山人服其明

靖安

縣志

毛一瓚字獻卿遂安人萬厯進士知進賢縣天性清剛  
吏胥不寒而慄建文筆樓結彥社以勵學常緼袍麤  
飯曰非不近人情奈土瘠何有同籍持節過縣疑其  
矯廡排闥入內見家人坐簷下結巾厨惟蔬豆篋中  
葛布一端而已其人歎服而去擢吏部主事

進賢志

謝龍文號橋東瓊山人由進士任豐城知縣時流寇震

鄰募兵措餉寇不敢犯丙子歲大饑捐俸賑濟多所  
全活建倉廩新公署置義塚在任九年清操如一日

卒於官士民哀之

豐城志

胡時亨字慎三江南無錫人崇禎丁丑會魁為南昌府  
推官文學政事皆卓冠一時癸未素寇聚天井窩亨  
親勦平之餘黨皆率衆投誠

安志

郝錦字絅卿六安人崇禎丁丑進士授豐城令清里甲  
覈包攬翕然成治調新建其治新猶治豐陞御史侃

侃有諍臣風謝病歸結廬九江山

江南通志

胡時中字伯昭無錫人崇禎丁丑進士除南昌府推官  
己卯壬午兩分闈試稱得人民飢盜起數用方略定  
萬年金谿諸邑民變癸未春土寇李肅七肅十等造  
讖僭號通楚獻賊反巡按張鳳翮會虔撫林一桂大  
發兵討之承檄行監軍事乃定計殲渠散黨布謀用  
間以撫為勦不越月而平安民發賑清還子女收瘞  
枯骨三縣各立生祠

江南通志



國朝

楊泰字春和偏關人順治選貢授靖安知縣金逆之變  
泰以守土臣分當死慷慨自誓以身殉城聞者壯之  
山西人物志

張慎行字恒菴南宮人順治八年知靖安縣時安義縣  
寇猝至慎行募集鄉勇出奇計追逐殲之陞興屯同  
知靖安志

徐鳳鳴字祥宇遼東人順治八年任進賢縣壬辰冬土

寇闌入縣鳳鳴力與鬪面受一矢追賊手戮數十人

賊懼引去邑賴以安

進賢志

黎士毅字道行福建長汀人順治選貢知南昌縣邑舊糧溢額剴切陳請上官為之題蠲山賊彭某以偽劄煽惑村民士毅督兵勦滅渠魁授首尋遷知壽州

福

建新志

林鐘字仲呂福建南平人順治選貢由豐城丞知靖安縣邑先為盜所殘城鮮居民鐘至多方招集力為守

禦身入賊營諭以禍福賊不敢犯城者二年後大兵  
進勦鐘為運籌全活甚衆盜悉就撫兵燹之後請蠲  
民租修文廟課諸生百務重新以病乞歸祖餞泣送  
者不絕於道

靖安志

屠尚字渭綸常州人乙未進士性溫氣和有經濟才順  
治十六年知靖安縣未及暮月兩遭寇亂布策畫筭  
踰月盡平事聞上憲皆善之會用兵兩廣派解豆草  
并絳夫令下合邑惴惴設法報可裕如也在任三載

無封殖之私黜浮費汰冗役絕竿牘寓撫字於催科  
尤加意學校課試諸生人文蔚起致政歸士民有誰

嗣之歌焉

同上

王斗樞字均五諸城人順治乙未進士補進賢縣新學  
禮士繕城治兵開墾荒田若干頃奉檄進勦山賊湖

盜皆擒其渠魁督撫交章薦其才

進賢志

任暄猷號美君汝寧人順治乙未進士康熙癸丑補知  
寧州甲寅冬戍卒勾賊弁謀逆暄猷率義勇殺賊三

戰三捷城賴以全以功議陞知府

寧州志

魏雙鳳字雖伯獲鹿人順治戊戌進士任新建縣創縣治建學宮修驛築塘百廢具舉課士於西昌書院多所鼓勵癸卯分校尤稱得士擢御史

新建志

楊周憲大興人知新建縣江西舊多火患教民置火巷遇災多免延燎遞卒役勞而食薄購田贍之修學建書院皆善政也嘗葺邑志著羣書衍義

崇祀錄

江西通志卷五十九

欽定四庫全書

江西通志卷六十

名宦

四

瑞州府

南唐

王紹顏以討東甌功擢高安令後加游奕使伐馬楚復  
立大功先是唐改靖州為米州未幾改筠已而廢至  
是李璟特復筠州授紹顏金紫光祿大夫持節筠州

以寵異之時狼寇入境紹顏率義兵八十人立寨備

禦民賴以安

明一統志

按南唐書保大十年春分洪州高安縣置筠州以

王紹顏為刺史一統志林志俱作王顏者訛

陳承昭昇元中令高安有治才築羅城濬溝洫百廢具

舉於縣治中初虛窗疊閣邃簾深庭甚有政聲

同上

宋

甯麟慶厯間知新昌愛民禮士首建學宮既沒民為立



祠林志

周堯卿字子瑜道州永明人天聖進士知高安縣提點  
刑獄楊紘入境有被刑而耘苗者紘就詢其故對曰  
貧以利故為人直其枉令不我欺而我欺之又何怨  
紘至縣以所聞薦之後通判饒州累官太常博士堯  
卿為人簡重不校有慢已者必厚為禮以愧之居官  
祿雖薄必以周宗族朋友罄而後已

宋史

蘇轍字子由眉山人與兄軾同登進士科元豐初以忤

王安石謫監筠州鹽酒稅元祐初除右司諫為時人所忌再謫知袁州未至降少府監分司南京筠州居住時大疫鄉俗禁往來動靜惟巫祝是卜輟多製聖散子及煮糜粥遍詣病家與之所活甚衆徽宗朝復大中大夫致仕築室於許號潁濱遺老政和二年卒追復端明殿學士謚文定

同上

李懷道元豐中知上高縣始至建學宮不踰年執經而至者數十百人為政不苛而民肅賦役訟獄不諉於

府蘇轍以為有古之道其所以得民者非復世俗之

吏蓋紀其實云

明一統志

柳平字子儀武陵人元祐中知筠州江西惟筠州不囂  
於訟及子儀至政益清簡漸以無訟乃新燕居之堂  
榜曰江西道院以鼓舞其俗百姓悅之

林志

邵叶晉陵人元祐間宰新昌縣視事三月五色芝十二  
本生於室中黃山谷為之記

瑞州府志

崔鷗字德符雍丘人登進士第調鳳州司戶叅軍筠州

推官徽宗初立鷗上書勅章惇姦邪貶相州教授又坐元符禁流落二十年節行清苦後召為正言以龍

圖閣直學士主管嵩山崇福宮命下而卒

宋史

譚申長沙人政和進士紹興間知筠州旱禱於郊頃之大雨數十里歲饑民不能輸申請罷徵監司督益急坐降秩後致仕歸民感其仁立祠祀之號曰古譚

豫

章書

李公彥大觀中知上高縣誠心愛民凡歲旱禱雨輒應

禾必大熟民刻其事於石

明一統志

程全北海人建炎間筠州都監金人寇江西守臣遁全攝州事有盜祝生者攻州全拒之且戰且前至萬載兵少力罷而敗盜執之剗其腹而去

同上

姚鉉字夢元北海人紹興初為新昌丞攝縣事有政聲當路薦於朝除知本縣鉉文詞敏麗善筆札藏書至多雖被竄斥猶傭夫荷擔以自隨有集二十卷又采唐人文纂為百卷目曰文粹天禧四年卒

宋史

范潔字景圭劔浦人南渡初知新昌縣披榛櫟撫瘡痍以創縣治邑人賴焉紹興間守光化軍後守鄂州

林

志

羅薦可字養蒙沙縣人紹興二十一年知高安郡事政務修舉民輸納令自便及遷州學於鳳山宅高明而遠鄙俗後更常州士民思之

同上

黃輔之乾道間知上高居官清白好德尚義適亢旱巡閱民田災甚者悉蠲其稅邑士有言吾團獨不旱不

當蠲輔之曰不早猶言旱況真旱乎寧得罪於州郡  
毋得罪於吾民遂以通旱申上州郡大怒欲易之輔  
之抗章自劾朝廷從其請邑人德焉

同上

倪思字正父歸安人乾道進士淳熙丁酉為郡判官剛  
直不阿吏民懾服仕至寶文閣學士嘉定十三年卒

謚文節

宋史

徐應龍字允叔淳熙進士知高安縣呂祖儉以言事忤  
韓侂胄謫死高安應龍為之經紀其喪且為文誄之

有勸之避禍者應龍曰呂君吾所敬雖緣此獲譴亦所願也朱子貽書應龍曰高安之政義風凜然歷官

吏部尚書卒諡文肅

豫章書

芮及言字子及雲川人嘉泰三年知上高縣政事精勤容貌嚴厲一縣畏憚之號為小監司嘗書所坐屏後少飲酒加餐飯勤出廳公事辦莅官四年終始如一

林志

張次賢字子齊僊居人嘉定四年知上高三年政成始



營卒不屬邑轄入朝首言及之反以論去未幾入為  
正言貽書新尹趙汝笈請於朝乞重彈壓之次賢主  
其事於是邑宰權遂無兵馬邑人德之

上高縣志

趙汝笈字景師四明人慶元進士嘉定間知上高資稟  
明秀政事清嚴待士以謙斷獄以恕諸司疏其治狀  
為諸邑最先是上高諸鄉額有坊塲許人買換名曰  
教練每一名四季認白納錢少者不下百千民被其  
擾汝笈力申朝省遂罷之

明一統志

趙伉夫字尊道雪川人開禧間知上高縣內腴而外癯政尚慈恕不忍橫斂民懷愛之目為趙佛子踰年入

為樞密院承旨

林志

黃伯固字子高將樂人嘉定中知上高縣吏事精明剖決不倦大要以抑強扶弱為本姦豪屏跡稽攷版籍詭寄隱匿搜剔去之去之日餘三千緡悉留縣庫纖毫無所私

豫章書

夏祐永嘉人由進士嘉定八年尉上高以廉介自持州

縣有委一斷以公未嘗通當路書嘗謂人曰仕途奔競相率成風吾竊恥之窮達有命豈可枉道求伸耶

林志

唐璘字伯玉古田人嘉定進士以吳縣尉調瑞州學教授用白鹿洞教法崇禮讓後文藝士翕然知嚮累官江東運判時邊事急置四察訪使就詔璘分建康太平池州江西璘揭榜馬前咨所部以利害且奏損總領所錢二十萬緡擢太常少卿尋丁內艱居喪哀毀

不食久之疾卒

宋史

趙綸字子微寶慶間知新昌興利除害潔己愛民嘗修學宮建都倉四門館驛安濟院置貢士莊皆有成績

可觀

林志

林觀過號退齋端平間知新昌性敏捷有文聲聘饒雙峰至縣講學為邑士倡士習為之一變

同上

江湘嘉熙間知上高縣博學能文練達治體始至請於安撫吳因蠲積逋六萬餘緡前此民以賦急借青苗

田租凡數千石湘賦不違期無復預借庚子春荒發  
倉平價賑糶民賴以活瞻學有田無告有養新浮梁  
築陂堰廣灌溉因所利而利民者不可勝數既去民  
特祠祀之同上

陳登號敬齋三山人淳祐間知新昌縣鎮之以靜撫之  
以寬有豈弟之風踰年政平訟理民懷其惠為之立  
祠明一統志

曾塤紹興人開慶己未為瑞州錄事叅軍以州命行各

縣賑恤饑民值元兵至被擒主帥聞其名誘之以利  
不從且詈之遂死事聞贈秩官其一子

林志

陳訥景定間知州事增學田建浮橋興郡治創東樓三  
年職事修舉士民稱之陞太府丞

林志

方逢辰號蛟峰淳安人舉進士第一景定間知州事賈  
似道秉政上書詆其非歷官至吏部尚書

同上

應俊號東野天台人景定間知新昌弭盜安民政教無  
舉嘗奏罷縣稅著有琴堂諭俗編行於世

同上

元

盧源字子玉至元間瑞州總管時新昌劉奏差為亂源  
戮渠魁脅從者悉釋之嘗夜憇亭上鄰翁以杖擊物  
誤中源翁旦往謝源曰毋庸謝汝誤中他人耳其度  
量如此為政始終以廉靜稱

林志

余岳字泗濱上饒人至元間為本路教授學行修飭建  
仰高堂置官書嚴課試重小學考喪服正從祀具器

用學校一新

同上

實都沙元貞二年為瑞州路達魯噶齊會行省行諸路  
起徵夏稅亟召僚屬耆老議僉言袁州等路每田一  
畝徵糧四升惟本路獨用宋制所徵實倍他郡而官  
降斛斗又大三之一若以所餘折作夏稅有贏沙上  
其議遂得免民賴之

同上

房弼字仲明大德間知新昌州崇尚教化嘗設社學以  
教民子弟作州官題名記建惠民藥局尤工於書州  
之坊額皆其所題

同上



張珪歸德人為高安縣尹有異政擢江西檢校拜南臺御史元史張懋傳

按府志珪於至順間莅任為政清明斷獄無滯勸農桑平賦役歲饑諭富室貸鈔糴糧五萬石以活民命邑人立祠祀之

劉基字伯溫青田人幼穎異至順間舉進士除高安丞發奸摘伏不避強禦為政嚴而有惠百姓安之以行

省辟謝去

府志

禹蘇福至正十一年為本路總管紅巾寇起福督兵討之斬獲萬餘後又屢敗紅巾繕治城池民賴以安

林

志

和尼齊至正十三年以福建左丞統軍來督瑞州克復本路誅徐壽輝將況普天等未幾普天黨李五率賊圍城凡三閱月和尼齊糾聚義兵及調苗軍指揮拒戰斬獲萬餘李五遁去時華林黃嶺等處盜賊蜂起和尼齊且招且討以漸平服民恃以安後官至平章

安志

劉朝宗至正十八年知高安時兵事擾攘日不暇給朝  
宗辟選吏胥設社長坊正助公家為禦敵計一日劇  
賊張赤脚謀三鼓攻城朝宗諜知嚴兵以俟戒鼓人  
勿擊三更賊倦睡達旦知有備僅掠牛畜而去鄉民

賴馬

林志

明

李懋蒲圻人洪武初知新昌州創州治建譙樓學校橋  
梁百廢具興有諭俗文曰敬父母厚人倫訓子弟務

農桑崇學校息訟爭禁賭博慎廉恥言皆切實至今

稱之

林志

沈秩洪武中知高安縣操行清慎撫循有方獄無冤滯

民皆愛慕

明一統志

黃拳字公衡天台人洪武間知上高縣始至值旱有言  
裏陂溉田甚博而艱於力拳力修之歲連獲利凡學  
校壇壝稍有敝陋者無不修葺臨終賦詩曰他年化  
作遼東鶴重看敖峰錦水春邑人建祠祀之所著有

冰壺集

林志

魏希哲字原明蕭山人年七十精神不衰以歷練老成  
應薦永樂間知上高縣廉以律己明以燭奸盜賊屏  
跡豪強畏威其子驥官吏部尚書

明一統志

張賢漳州人永樂間知新昌縣秉性剛毅為政有方不  
避權要時郡守不法賢疏劾去之正氣凜然遠近皆

畏服焉

府志

周觀德東莞人正統間為上高縣丞會旱積誠祈禱烈

日中步行四十里至蒙山龍湫返途中雨如注從者  
進蓋觀德曰赤地百里垂枯萬戶惟祈雨足焉用蓋  
為冒雨至縣平地水深尺餘歲賴有獲

同上

陳璣福清人由吏員授進賢縣倉大使正統元年侍郎  
趙新薦知高安縣長才濶略應酬如響先是邑之遠  
民不附璣至示以恩信弗率者繩之以法境內翕然  
林志

諸觀字民瞻餘姚人成化進士以工部員外郎陞瑞州

知府威加暴橫惠及小民嘗自誓曰貪墨之吏猶不  
貞之女一有點污何以見人時有訟者暮夜餽金不  
受卒寘之法後以忤時貴調南安同上

劉璣字用齊咸寧人成化進士以戶部郎知瑞州府務  
德化甘清苦家食常不給公服外無餘衣新昌盜起  
璣率兵抵賊巢諭以禍福賊皆感泣散去累官至戶

部尚書

安志

劉羽德州人由舉人成化七年任瑞州同知恬淡寡慾

為政知所務首建文廟斂不及民常俸外秋毫不染  
終年食蔬瑞人呼為青菜劉陞鹽運同知

林志

張壘字元器歸安人成化進士知上高縣興學政均賦  
役節浮費弭盜賊時新昌降賊譚尚武者假巡捕之  
名擾害鄉民壘密疏奏除之地方以寧累陞福建副  
使

府志

陳鉞字廷威莆田人成化間以麻城教諭陞瑞州府學  
教授師範端嚴動靜不苟每講論雖盛暑必衣冠尤



長於古文著有古厓詩集

林志

顧純字以正華亭人成化進士授高安縣政在恤民不  
事苛刻歲己亥大旱民不聊生純力請蠲租又勸富  
民賑貸民賴以活者甚衆

同上

龔伯寧字文卿崇陽人成化進士授新昌縣植弱鋤強  
勤民平政革風弊摘隱伏人服其明正疆界興水利  
人被其澤以述職卒於京

同上

張錦岳池人弘治間為瑞州捕盜通判有謀勇每遇賊

發輒能先知嘗得賊繫至湖城賊黨追急乃身先禦之賊退又設伏以俟錦紹賊就食間道急趨賊不能

害

安志

王本義字汝宜松滋人弘治中由解元授江陰訓導陞高安知縣誠以馭民勤以聽政每治公事令兩吏讀民詞且治且聽竟無違錯操執堅白八年如一日致仕後復以事至瑞民爭挈壺漿送之有至九江而返

者

林志

童旭字賓陽沔陽人弘治進士知上高縣正直廉明不

徇權勢凡境內淫祠毀之殆盡累陞知府

府志

宋以方字義卿靖州人弘治進士除戶部主事正德十年遷瑞州知府時華林大盜甫平瘡痍未復以方悉心撫字吏民愛之宸濠逆謀有萌而瑞故無城郭以方築城繕守且募兵三千日夕訓練宸濠深忌之有徵索又堅拒不應以是積忤迫鎮守劾繫南昌獄其明日宸濠反破獄出以方脅之降不可械舟中與俱

行至安慶兵敗問地何名舟子言黃石磯江西人音則王失機也宸濠以為不祥遂斬以方祭江後賊平其子崇學行求遺骸不得乃斂衣冠歸葬之嘉靖六年有為宸濠駕舟者目覩以方之死為人言之巡撫陳洪謨上其事詔贈光祿卿蔭一子立嘉忠祠瑞州以祀之

白志

袁瑤字廷璧山東成山衛人有膽氣精騎射正德六年任高安主簿當道委以捕賊不避艱險十年建昌賊

首徐九齡等聚衆醴源洞兇焰甚熾瑤承檄統兵分  
勦與賊對敵死於陣事聞贈知縣從祀節愍祠

林志

胡堯元字廷獻蒲圻人正德進士任戶部主事以抗直  
謫高郵州判尋遷瑞州通判時宸濠謀逆堯元兌運  
吳城戴笠步歸遂練兵為討賊計未幾逆黨李儀賓  
統鄉兵自上高下迫郡順從堯元率勇士一鼓盡擒  
戮於石鼓潭宸濠氣阻瑞州城全堯元之力也以功  
陞本府知府尋陞廣西左參政瀕行老少泣留者數

萬人祀遺愛祠

安志

按王守仁辭爵疏略云宸濠變初起勢焰昌熾人心疑懼當時首從義師自伍文定邢珣諸人外又有知府陳槐胡堯元曾璵等知縣劉源清馬津傅南喬李美李楫楊材王冕顧佖劉守緒王軾等或摧鋒陷陣或遮邀伏擊贊畫謀議監錄經紀所謂同功一體者也今臣獨崇爵而此同事諸人或不行其賞而并削其績或賞未及播而罰已先行或

虛受陞職之名而因使退閒或冒蒙不忠之號而  
隨以廢斥羣憎衆嫉臣竊痛心奏入寢不行

原跋

姜榮字仁甫餘姚人由進士以工部主事任瑞州通判  
署府篆適華林賊猝至榮以印屬妾竇急出募兵竇  
埋印於地城破被執時有盛老者亦被虜竇給賊釋  
之令報官索金帛贖我遂密囑白印於官盛老去竇  
投井死榮因此果得印募兵四至賊亦稍却會知府  
鄺璠至榮與戮力勦盜已而修繕城池屹成保障郡

人賴之參議沈煉有記實奉詔旌祠

府志

鄺璠字廷瑞任丘人正德進士知瑞州府甫莅任華林盜猝至璠素諳兵略率民兵登譙樓手發毒矢射却之賊退築城堡謹坊巷調兵旅踰年賊始滅民得安堵在任彰善瘡惡修廢舉墜毀淫祠興學宮修瑞州府志執法不私因忤時貴罷去筠人惜之祀遺愛祠

同上

張翀字鵬舉泰興人正德進士授上高縣會逆瑾竊威



所在輒籍民產，力過之弗避，禍害華林盜掠郡縣，  
州振肅，兵威賊不敢肆，召為監察御史。安志

王以旂字士招，江寧人，正德進士。除上高知縣，華林賊  
方熾，以旂訓鄉兵禦之，賊不敢犯。累官兵部尚書三

邊總督，卒贈少保，諡襄敏。林志

按瑞州志：以旂慈祥愷悌，禮士愛民。時寧邸恒派  
幣物以剝民，以旂獨不為，頤使歲省錢數千緡。修  
城池，建社學，內召之日，士庶遮留，舟不得進者數

日

許仁卿字天爵臨海人應天解元嘉靖二十年任瑞州知府會大饑穀價騰踊仁卿多方救濟全活甚衆餓殍填壑者捐俸殯之又倡建仁濟橋功存永世

安志

鄧之屏巴縣人嘉靖進士隆慶間知瑞州府作興人才下車即聚四學之後會文筠陽書院躬親評閱月給膏楮是科發解魁九人大旱步禱甘霖隨沛明年復荒勸富室平糴施糜粥民獲更生立倉以垂永利憫

高安賦額偏重詳減之又以民苦徭役取回九江協濟請行條鞭法陞蘇松兵備筠人思之不能忘

同上

陸時雍字幼淳歸安人嘉靖進士授上高縣精勤吏事嘗建便民倉又纂水利志以便一方農事至今賴之

累遷江西提學副使

府志

端廷赦字世恩當塗人嘉靖進士授高安知縣設立聽息碑凡有詞訟願休者聽其講和無纖毫科罰督稅寬立三限不假筭楚有遠年收贖監追無措捐俸助

之優禮庠序訟簡刑清遷御史

同上

竇茂字文盛永平人嘉靖中任上高縣丞平恕勇斷時邑有四無賴少年肆行剽掠民苦焉茂捕得置之法

一邑稱快

安志

程大廉長洲人由舉人隆慶間知上高縣縣舊無城大廉重築之民無勞累而四封屹然陞荊州同知

同上

戴尚志蕭山人萬厯中以刑部郎出知瑞州府實政愛民無勾攝之擾無留滯之獄高安苦兌運且有賣產

鬻妻子者尚志與知縣田一甲議為官兌乃令糧簿  
先期排定船隻民運至舟官押赴省闔邑免累至今  
誦之陞雲南副使田一甲以進士知高安四川忠州  
人同上

周之基字季子湘潭人萬厯進士由戶部郎出知瑞州  
府以高安受倍賦之累前守王以通特疏具奏未有  
成議之基謂賦役之苦不如令父老自行陳乞方可  
邀恩即草疏令民王乾等詣闕請命又徵科務寬民

力葺學宮修廨署橋梁城濠整飭一新竟以催科從寬為忌者借言及之之基拂袖去郡人懷之立去思

碑

同上

張志淑字世彥臨海人嘉靖甲午解元授瑞州推官摘發悉當合境稱神狡險健訟者皆相戒無犯張使君直指巡列郡必檄與俱志淑慨然激揚自任墨吏悉望風解綬分宜柄國志淑弗與通遷廣西思恩知府

浙江通志

毛愷字達和江山人進士初授御史著直聲出知瑞州府清慎淡薄涵養深粹喜怒不形常進諸生講學時缺督兌官愷立限躬徵不踰月而集撫按曾刻其名勵各郡愷至孝母遘疾輒泣禱身代數月不解衣改知寧國行李蕭然及母卒衢城幾無以殮瑞郡寮屬遠道馳奠悉反賻金時有孝過黔婁廉方伯起之譽又稱為天下四君子之一

安志

董紹字宗達武進人進士授新昌令精敏而清介所需

一切取辦於家既而入覲家人誤攜一銅缶已去任  
三百餘里趣還納之

江南通志

趙捷字習南鶴慶人舉人瑞州府同知攝高安令有大  
獄株連數十人捷坐殺人者數人餘俱杖釋力爭于  
上曰吾不忍殺人以媚人上官銜之遂致仕歸

雲南

通志

湯有光字孟弢上元人舉人知瑞州府政不苛擾嘗夢  
郡有火災竭誠齋禱明日闔郡見火星南飛災竟免



江南通志

岳方川南充人舉人知高安縣清德藹然務與民休息  
訟者溫詞勸釋多感化退服陞任去民肖像祀之

安志

素斌號佐廷鄆縣人射穿七札舞槊如飛任江西叅將  
值奉新土賊李肅七等攻掠村邑斌奮勦矢盡戰沒  
於陣然賊鋒由此亦挫人咸稱其捍禦之功不獨以

勇烈著云

安志

鑣龍巖人萬厯舉人任瑞州府同知愛民懲奸不避  
強禦時巡按有訪犯屬鑣問鑣得其冤輒為末減曰  
殺人媚人古人所恥三駁仍不可奪巡按批曰縱宦  
情淡薄不應如是之執也鑣即致仕去人稱古之遺

直

同上

王照山陰人萬厯舉人知新昌縣勤敏愛民丈量田畝  
布衣草履躬行田間併鑒高安浮糧苦累寧隘其額  
而毫不敢浮民陰受其賜

府志

林之蘭安化人萬厯中由國子生任瑞州通判念存愛  
民因筠多水災米價騰踊捐俸置義倉積穀至三千  
七百石以備荒郡前浮橋商稅舊苦搜索力申革之

四民頌德

安志

潘仲驂字時乘烏程人由編修左遷瑞州推官資性敏  
捷剖決如神豪惡斂跡改廣福寺為尊道書院堂亭  
號舍規制煥然置學田以贍士陞太平府同知累官

廣東僉事

同上

陳江長樂人萬厯間貢高安縣丞以劉誠意曾官此作  
景劉堂矢志冰清六載如一上官屢旌其廉署縣事  
能聲益著歲饑捐俸飯飢者殯死者上下稱其仁陞

興州同知

同上

楊大名字君實湖廣江夏人由舉人知縣陞瑞州同知  
有幹才時以贛州九蓮洞之變督撫檄修城大名董  
其事南瑞兵備缺官以大名署印多所區畫凡爲同  
知十三年三署兵道印四署邑印兩署府印皆以廉

能稱白志

國朝

孟命世字淑子懷寧縣諸生順治戊子金聲桓叛命世隨

大兵入江省委知瑞州府歷一年題敘實授時兵燹後繼以大饑命世單騎履畝開除荒糧民甚德之府志

張仁聲字四服武強人由恩貢知縣陞瑞州同知時高安劇盜猖獗仁聲遠偵近訪得其情形一日以酉刻

傳集營兵直搗賊巢擒其魁境賴以安

高安志

易道沛漢陽人順治己丑進士任上高知縣詢民疾苦  
興利除害歲饑捐俸買穀以賑申請題蠲浮糧士民  
懷之

邑志

黃運啟昌邑人由進士令新昌多善政甲寅山寇竊發  
運啟集義勇為勦守計乘賊既散乃以兵直搗其巢  
渠魁殲焉邑賦浮於田力請題免浮糧若干石民立  
祠祀之

崇祀錄

林運鑑字千史廣東文昌人康熙舉人知高安縣躬親  
勸稼建文昌閣集諸生誦讀置田為膏火資分校鄉  
闈所取皆知名士禁溺女置義塚折獄嚴慎任七載  
報最以母老陳情不獲卒於任

廣東通志

袁州府

唐

唐萼武德間令宜春始建學於縣南寶積寺左至今祀  
之

林志

房琯字次律河南人天寶間為宜春太守立學宮建文廟創州治遷憲部侍郎同中書門下平章事

唐書

閻瑜廣德間袁州刺史兵後專務德化招集流亡州境大理及改撫州百姓蟻隨吏不能止後拜戶部侍郎

明一統志

蕭定字梅臣僕射瑀曾孫為元載所惡外遷袁州刺史大厯初治信州奏最為天下第一勸桑稼均賦役集徠游口在常州蕭復濠州張鎰之右遷戶部侍郎官



至太子太保

同上

柳渾字夷曠本名載梁僕射揆六世孫後籍襄州天寶初擢進士第大厯初為江西團練副使俄為袁州刺史酌古良牧之政宜於時者宣行之召拜諫議大夫朱泚亂素聞其名以宰相召渾羸服步至奉天言臣名向為賊汚且載於文從戈非偃武所宜乃更名渾貞元元年遷兵部侍郎

唐書

崔倕建中初詔求可為良二千石者倕得權袁州刺史

至官暮月以成績聞遂拜刺史

明一統志

李將順元和四年自員外郎出知袁州時州多火災將  
順一日與僚屬出西郭門見南山水可堰乃命築防  
疏溝引水入城使可通舟郡人利之名曰李渠又於  
城外西北築塘名曰益州功施後世民立祠以祀

上

韓愈字退之鄧州南陽人擢進士第元和十四年以言  
佛骨貶潮州刺史移刺袁州州人以男女為隸過期

不贖則沒入之愈至悉計傭得所沒歸之父母七百  
三十一人歲大旱為文禱於城隍及仰山神甘澤立  
應慶雲見進圖表賀穆宗即位召拜朝散大夫奏乞  
以在素日放免傭隸之政推之天下著為令

唐書

揭鎮乾寧二年守素州興利除害惠鮮疲瘵勸課農桑  
財用饒富增築羅城濬治濠塹斂不及於民

林志

杜琯天復元年以司空為素州刺史當喪亂時阜財恤  
民捐私帑代輸民賦人皆感之

同上

韋建太和五年知棗州在任築開羅城二百餘間濬濠

二百丈清淨為政無所侵撓郡中大治

安志

按南唐有韋建見後此又一人宜並載今補

南唐

劉仁贍字守惠彭城人事烈祖為左監門衛將軍自黃

州遷棗州刺史規畫有方一新州治後守壽州盡節

南唐書

邊鎬保大中以定楚功除棗州刺史增修城堞州北廣

濟橋唐中和年權刺史鄧璠所建水衝毀鎬聯舟十  
二為梁名曰永濟宜春有浮橋自此始

林志

按府志同此陸游南唐書稱鎬保大初年拜信州  
刺史八年馬希萼入潭州命鎬以州兵如界上覘  
楚九年鎬出宜春遂討長沙破其軍云是由信州  
刺史立功後改袁州未可知或據南唐書以林志  
誤非也

韋建少居吳武王軍中以膂力聞累遷諸軍都虞候為

左衛使出為袁州刺史建不知書而性渾厚清靜自處無所侵撓郡中大治數年入為統軍百姓思之南

唐書

張承傑初詔監臨袁州闢州治昇元四年詔權申報袁州軍又奏移州廨復故基重立甲杖樓庫是年召歸保大八年再除知袁州專以慈仁訪求民瘼課效為最

安志

史公銖保大中以太保自池州團練使除袁州刺史政

事練習吏不能欺文武兼資民慶安堵

林志

宋

程元白中山博野人太平興國初明經中第為宜春令  
居官有惠愛不求名譽後以子琳貴累贈太師中書  
令

同上

王懿至道間知素州時州多火災疏唐李渠以備之民  
歌曰李渠塞王君開四民惠利絕火災

明一統志

張希顏景德間知萍鄉縣時張詠問殿直范延貴曾見

好官否延貴乃稱希顏詠問何以知之答曰昨過其境驛傳橋道皆修葺野無惰農肆鮮賭博市易不喧夜中更鼓分明以是知其為好官詠乃薦於朝

明一

統志

張錫字貺之漢陽人大中祥符元年甲科試祕書省校書郎知南昌縣遷萍鄉令為人淳重清約雖貴奉養如少賤時讀書老而彌篤累官侍讀學士右諫議大夫贈工部侍郎

宋史



袁延慶天禧初通判袁州有能名刺史李龜從異待之  
州務多委決復舊渠以備火災立疏泉亭刻石記其

事

林志

王揆以著作佐郎知分宜縣景祐丙子夏大雨水公私  
廬舍墊溺揆修葺解舍建大門長樓皆節費為之不  
斂於民民懷其德

林志

祖無擇字擇之上蔡人進士高第歷知南康軍海州提  
點入直集賢院出知袁州自慶歷詔天下立學十年

間徒文具無命教之實無擇首建學宮置生徒郡國  
絃誦之風由此始盛 宋史

李禹卿字君益由蘇州通判移知袁州會知州翁及死  
哀其貧適吳人歸職田錢二十萬立分其半遺及家  
僚屬亦合錢二十萬以賻遷知澤隨二州既去民懷  
其恩官至司農少卿 林志

張補之治平間知宜春縣政尚仁愛民懷其德邑人朱  
景陽作詩榜於道頌之 明一統志

唐謨熙寧間以寺丞出知萍鄉下車修鄉校訪儒生親執經講說學池中忽生瑞蓮是歲郡貢士四人而縣

居其三

萍鄉志

按科目志熙寧二年己酉鄉試蘇方叔彭襄高無黨皆萍鄉人

徐師閔字聖徒蘇州人熙寧間以司農少卿出知袁州時江西劇賊詹遇所過屠劫素獨有備賊不敢犯且有瑞粟嘉禾之異百姓歌之轉運蔣之奇薦於朝官

至中散大夫

豫章書

廖子孟字獻卿元豐三年以屯田郎中知索州時太平

日久慮民狃於安樂乃即黃圃創巡檢司養兵以禦

盜仍奏置巡檢一員

安志

鄭民瞻字叔巖紹聖初知索州發姦擿伏如神值連歲荒歉乃量民戶口多寡及富民積穀幾何均數約直

以給告糴者合四境為一圖置座隅遣人按視民賴

無流亡之患

明一統志

辛炳字如晦福州侯官人宣和初由殿中侍御史知袁州興學愛民累官除顯謨閣直學士知漳州未赴而卒炳操行清修歿後貧無以葬詔賜銀帛賻其家贈通議大夫

宋史

孫琪宣和六年通判袁州時民屢患火災琪見袁延慶疏泉亭記乃治西陂濬舊渠如故自為文記之

林志

阮閱字閱休建炎元年知袁州初至訟牒煩瀆閱大書依本分三字印榜四城郡民化之乃榜西廳為無訟

堂後致仕寓居宜春

袁州府志

汪希旦字周佐建炎初知袁州築城濬濠修備戰具又

建內城西門民賴以寧

同上

王仲巖字豐甫建炎間知袁州時流賊逼城仲巖率兵

堅守親撫士卒踰月不困賊知其不可下遁去

林志

鄭强崇寧進士由國子博士知萍鄉相傳縣民多瞽强

相縣治鳳形當有目因鑿二池於縣前居人果無目

疾又建館步橋築蘆溪陂民咸德之

萍鄉志

陳煇字元光紹興中知袁州募韓愈為人立景韓堂刻  
昌黎集於郡齋尤注意興復學校教育士類

明一統

志

沈昭遠字傳曜紹興中由戶部侍郎出知袁州舊試貢  
士皆寄僧舍昭遠始創貢院民輸義倉米倉吏違法  
倍斂力為減其半時四邑以羨餘米上昭遠曰此非  
天降地出無非虐取於民盡卻之民皆感悅

同上

王大寶字元龜建炎初廷試第二授南雄州教授以祿

不逮養移病而歸閱數年知袁州進詩書易解上謂  
執政曰大寶留意經術其書大可采可與內除遂除  
國子司業兼崇政殿說書孝宗即位除禮部侍郎

宋

史

郭濤紹興間知萍鄉重建縣治兵寇之後撫恤有方民

心悅服

萍鄉志

曾伋字彥思紹興末年知袁州悉心愛民隆興初有旨  
江西和糴百萬轉輸丹陽伋奏不可朝廷從之袁得



免和糴役之力也

明一統志

胡安老建安人紹興三十年宰宜春政先撫字不為鉤

距民安樂之為立祠

林志

徐昇紹興三年知萬載縣時江南所在盜起州縣焚毀  
民不聊生昇請濟師討定凶殘重建縣署境賴以安

安志

張栻字敬夫丞相浚子孝宗時知撫州復知袁州暇日  
召諸生告語民以事至庭隨事開曉具為告條斥異

端毀淫祠而崇社稷山川古聖賢之祀官終右文殿

修撰

宋史

張杓字定叟浚次子知素州方年少已有能稱官至兵

部尚書端明殿學士

同上

按定叟知素州時創周程三先生祠朱子有記林

志稱杓崇尚儒雅修郡學明倫堂稽古閣兄棡為

之記

柯春卿三山人淳熙間宰宜春吏事精明剖決不倦太

守張杓雅器重之遷邑庠於秀江北後倅大府亦著

能聲

林志

祝勛三衢人淳熙中知萬載時學宮為監市所居學官

生徒皆寓古寺勛乃恢復舊址一新之

同上

趙師處字學古朱子門人紹熙間知縣事勤撫字慎催

科恤貧病輟俸為賓客之資卒於官貧無以斂

明一

統志

潘友文淳熙間為萍鄉縣尉值歲饑賑濟有方民德焉

已而諭邑士鍾詠輩立社倉為經久計朱子記之同

上

許及之字深甫永嘉人淳熙中知分宜縣奏免縣積負  
十七萬緡後陟官去猶請減縣月椿錢後知樞密院

事

安志

曹訓字子序自贛移知袁奉法鋤奸廉得萬載有豪民  
武斷者盡繩以法總倉二司委郡和糴訓曰袁免和  
糴舊矣不可一旦開病民之端祈懇切至竟得免

林

志

徐傳字宗說倅大府以稱職聞知袁州慈祥廉介不妄  
費公帑漕臺下令和糴傳募曾曹二公免糴記具請  
漕不復強

同上

李訖字誠之故參政文肅公邴之孫守宜春燭事無遁  
情而行之以恕正俸外例所當得者皆不受撙節浮  
費得粟二十萬別廩貯之以待荒歉名州濟倉

府志

王撰紹興人嘉泰二年以奉議郎知萬載縣事一切庫

陋改撤增新發豪民易谷梁之惡逮赴詔獄奸猾屏

跡萬載志

李時中字守正由軍器監丞知袁州惻惻無華慈祥廉  
介秩滿除廣東提舉去之日書所得俸白之仰山神  
曰此外無一毫他取神其鑒之其刻厲如此林志

李觀字東之以太常博士知袁州剖決明敏賦性廉介  
不可干以私後除本路提舉茶鹽同上

鄭自誠字性之嘉定戊辰廷試第一為著作佐郎出守

袁州政先撫字飾以儒雅時詣學宮創藥局以濟病者去之日攀轅者塞途

明一統志

滕強恕字仁伯嘉定間由宗正少卿出守袁州以節用愛人為本立橋梁置儲倉修郡志惠政頗多秩滿除

江西漕運

同上

王棟字子東文正公淮之子由司農少卿出守袁州政尚簡靜而馭吏以嚴人不敢玩秩滿改知泉州

林志

趙致夫字仲禮觀文殿學士彥逾仲子以朝議大夫守

素州待士撫民治軍戢吏一出於誠懇餉司得免和  
糴以公帑之餘為下戶代輸創御書閣貢闈仰山臺  
城郭樓櫓俱新之理宗嘗問廉吏真德秀以筮夫對  
除直祕閣為湖南憲使

明一統志

曹叔遠字器遠温州瑞安人少學於陳傅良登紹熙元  
年進士第以工部郎出知素州減秋苗斛面米七千  
四百餘斛浚李渠興學校懲毆訟邦稱大治

林志

潘傅字才甫四明人寶慶初通判素州攝州事聽斷精



明風采峻厲庭無留獄吏不能欺而待士尤加意焉  
明一統志

徐瑒字文之嚴陵人紹定間通判袁州值歲歉極力賑  
濟全活甚衆民德之為立祠

同上

葉夢鼎字鎮之寧海人以太學上舍試入優等授信州  
軍事推官攝教事講荒政遷太學錄淳祐中知袁州  
轉運司和糴米三萬斛夢鼎言袁山多而田少朝廷  
免和糴已百年自今開之百姓有無窮之怨從之民

湯頎獻田學宮妻子離散夢鼎還之毀萬載旗簫村  
淫祠塞其妖井丁本生母憂免喪以直祕閣江西提  
舉常平無知吉州節制悍將置社倉義倉平反李義  
山受賊之寃以國子司業召尋復以集英殿修撰差  
知贛州

宋史

程公許字季與一字希頎敘州宣化人嘉定進士淳祐  
間知袁州請蠲和糴之半改命郡吏部總所綱運而  
厚其資免募平民民甚便之新瀛溪祠南軒書院聘

宿儒胡安之為諸生講說杜範薦於朝召拜宗正少

卿宋史

方岳字巨山祁門人景定間知袁州新橋梁及城門後  
邕廣連兵出湖湘傍江西而北袁有城可恃者岳之

力也林志

元

默爾根女直人高諾爾子襲父職領兵鎮廣東元貞元  
年移戍袁州盜陀頭以衆犯境悉勦除之尋南恩盜

起復領兵平之還歿於袁州贈懷遠大將軍

元史高

諾爾傳

嚴仲毅字伯威袁州路經歷修夫子廟興舉學校躬尊

經閣并南軒書院藏書閣

林志

布色沁袁州路達魯噶齊至正壬辰九月歐普祥兵圍

城城中固守明年十一月食盡城陷布色沁與同知孫

嗣遠被執不屈皆遇害知事程鵬翼自焚死同時宜

春簿周子忠被執亦死焉

林志

托克托至正間同知萍鄉事剛勇果敢壬辰斬黃紅巾賊  
歐普祥率衆由湖南醴陵至縣黃花渡托克托集義兵  
拒戰死之

林志

明

趙中字允中懷寧人洪武初知萬載縣時紅巾殘毀之  
後民轉徙不遑城中不滿百戶中勞來安撫悉復縣  
郭置七坊廂縣廳譙樓廟學皆其所建

林志

趙彝洪武三年任萍鄉知縣招流亡撫孤弱建置設施

條理精微繼任者為李順英陝西人

縣志西安人

改建儒

學作興士類民安其化

同上

賈志通淮安人洪武初知萬載縣為政愷悌民懷其惠

廟學未就捐俸率邑人鼎新庠士課程躬自稽督秩

滿去士民思之

同上

杜谷珍繁昌人洪武初知萍鄉兵革後招撫流亡立鋪

舍勸畊織百姓安之未幾卒於官葬邑南

安志

束清丹徒人洪武間以人才授萬載知縣慈愛廉明儉

以自奉民或逋租負不能償者代完之

明一統志

舒仲誠貴池人建文時由太學生任萬載縣為政嚴明處斷平允小民逋逃勸富室貸以種穀農具僦以房舍勿收其息民翕然歸之嘗朔旦謁廟里婦有篝燈晨績者賚之米布由是相勸以勤擢湖廣按察司僉

事

林志

周鐸鄆城人永樂中知袁州府剛毅廉正興學校革奸

弊郡人悅服後卒於官

明一統志

何正永樂初知萍鄉縣值鄰境李法良作亂湘潭醴陵  
間正導素軍討平之又築陂灌田數千頃民為歌曰  
寇至侯禦之民飢侯食之至今頌焉

豫章書

汪悠久餘姚人由太學生宣德初知萬載縣法制嚴整  
洞察隱微先是邑逋賦有至六七年者民逃亡過半  
悠久至為奏免之民始安業

林志

姚文字敏學嘉興人正統間知袁州府廉正有威吏不  
敢欺興利除害民皆稱便卒於官囊橐蕭然

明一統



志

周瑛嘉定人由太學生正統初知分宜縣先是縣糧額每畝科一斗六升民久逋租瑛疏準每畝止納本色米五升三合餘折銀布民至今德之

林志

李璨福清人正統進士知萬載縣寬猛得宜獄訟屢空朔望詣學勉勵諸生寬其徭役士翕然知學都御史韓雍以廉能薦陞衡州通判

同上

吳瑀山陽人由進士景泰中知分宜縣釐革積弊門不

設監鑰而請託私謁無一至稅糧申派折色歲派均  
平民投牒訟訴悉令自拘攝至則決以片言而去天  
順中召為監察御史同上

邢廷禎金華人由廣州經歷成化二年擢萬載縣明敏  
平恕撫恤犂獨尤惓惓焉民苦餉官馬廷禎請諸公  
府極言其不堪民始免累府志

莫立之字斯立錢塘人由進士成化間知分宜縣以仁  
恕稱修學築城建倉造橋具有成績擢監察御史

林

志

陳瑤字仲華全州人成化進士知萬載縣革吏弊悉民情以興學勸農為務陞監察御史歷官至都御史

明

一統志

吳蘭字佩之崑山人由進士弘治間授分宜縣慈厚廉謹却徵稅羨餘市穀置萬石倉以賑濟召民即縣廩下秤收糧里加耗宿弊頓革擢南京監察御史

林志

梁奎順德人由舉人正德間通判袁州時桃源峒賊猖

獮奎領兵勦捕奮勇力戰歿於鋒鏑士民哀之

同上

徐璉朝邑人弘治進士由戶部郎中出為索州知府宸濠變起璉起兵會王守仁於樟樹鎮同臨江戴德孺贛州邢珣等各將精兵破宸濠於黃家渡獲首功事定遷江西右參政世宗錄功增秩二等

白志

陸璫蘭谿人由鄉舉正德六年知萬載縣多惠政巨豪為盜者璫薙剪不遺力歲饑民多逋負移檄交至璫即自就械繫民咸願身代璫曰父老母自苦吾寧以

此去無忍爾輩流離也勸課生徒撫循孤寡皆存心惻怛後竟以謗調民痛哭遮留至今思慕之

府志

嚴鳳歸安人由舉人正德間知分宜縣敷政以寬便俗宜民部使至督糧急鳳請身代繫以需征期立傳箭遞發以探警報自奉最儉敝衣疏食而已陞南昌府

同知同上

王卿臨縣人嘉靖間知袁州府質實有器度禁隸役勾攝民有訟願自平者聽由是獄訟少減尤留心學政

別勤惰時廩餼士習一變轉浙江按察副使

同上

史立模餘姚人由進士授給事中謫通判歷素州同知政尚威嚴以法繩豪武不得逞歲蝗捕之以米斛易蝗一斗蝗遂盡遞馬差因設四季馬甲法以節逸勞著為令所至登眺賦詩陞惠州知府

安志

張參華亭人由舉人嘉靖間任宜春知縣敏辨有吏才民苦糧長徵收參設局縣門立十限法民便之歲饑設法賑濟陞工部主事

同上

徐棡字世寅常熟人嘉靖進士知宜春縣為政寬恕滌除煩苛建藏書閣新啟聖祠清學基校士拔其雋者

館昌黎書院三年擢御史

宜春志

楊自治字以善崇慶州人嘉靖間令萍鄉勤敏廉謹歲省里甲浮費數千金草錢糧包攬積弊修學繕城置橋梁立社倉裕民儲蓄時有流賊之警荆關營以為保障陞本府同知累官至雲南按察司僉事

安志

范欽字堯卿鄞縣人由進士嘉靖十九年任袁州知府

詰奸剔蠹羣盜屏跡屬境肅然又念素民貧苦賦重  
力請於上得少蠲減百姓德之

府志

素襲裳字子宜睢州人由進士嘉靖三十二年任素州  
知府樸質清修禮士愛民藹然冬日嚴嵩方當國不  
肯阿附蒼頭有犯者必繩以法陞江西副使

同上

李元璫初以貢士授素州訓導循例承府命往省祝寧  
府壽禮畢登舟而宸濠叛勒各教官傳檄璫不屈裂  
冠袍欲投江以救免後應王守仁成討賊功

福建通



志

劉懋永平人舉人由南京刑部員外郎陞袁州知府清  
通敬慎莅事勤能重刻李泰伯學記立石郡庠門外  
鼓勵諸生力行實用之學秀江橋圯捐貲甃石以圖  
永久其上架屋連楹士民德之

袁州府志

王俊字世英閩縣人由戶部員外郎陞袁州知府風采  
嚴整政令明肅務持大體不忽輕細凡豪家武斷者  
雖有倚恃一繩以法吏民畏憚修學宮建大成殿新

明倫堂課授生徒時臨稽閱一時士風翕然振起九

載治平陞廣東叅政

同上

鄭惇典字維勅侯官人宋萍鄉知縣鄭强裔孫也為素  
州知府嚴毅清慎律諸士以禮時勤課閱整修聖殿  
繕葺明倫堂飾治祭器虔供祀典尤重農務盡力溝  
洫一切政事具舉僚屬士民兢兢奉法又樂其寬仁  
云

同上

按府志載羅輅知素州器宇疏豁有風幹均差役

繕城隍置文廟樂器考正雅樂校試生徒親為課  
督其治行與惇典相似而前志羅輅已入南昌名  
宦事實不甚詳今采補附見於此

劉應熊字得陽隴西人嘉靖辛丑進士知分宜縣邑人  
王臣嚴嵩客也橫里中殺人應熊置於法監司某亦  
嵩客也承風旨陷之獄直指廬陵許公得其情雪之  
以卓異薦於朝拜監察御史

陝西通志

李德甫字仲修太倉人嘉靖三十七年任袁州知府有

惠政念素土科徵偏重力為申請每石得減派刻碑

儀門民感其德

同上

劉廷舉字巨塘麻城人初為宜春令以不附權要調尋為素州知府廉平仁恕威惠並著郡大饑廷舉發廩捐俸施粥民賴存活申明聖諭頒刻小學士風丕變去之日有徹底澄清一巨塘之謠

安志

趙日新晉江人隆慶進士知分宜縣會檄賣嚴嵩籍沒產牘版繁錯點胥乘以漁利日新授簡一目無遺寸

田尺宅莫敢隱性峻潔徵賦無溢羨鞠訟明晰里民  
某母以驟病卒里人以懟逆誣之日新從郡城歸適  
過其里假寐輿中若見婦人為子訴甚悉亟呼詢昭  
雪之邑以為神

府志

徐一唯蘄水人由進士隆慶間任萬載縣沉毅果決置  
學田以贍師生定瀏陽豪戶爭廣洞田地之亂擣大  
圍山巨寇李大鑾等民賴以安陞南京戶部主事

志

陸世勣邳州人由舉人萬厯間任萍鄉縣精明果斷愛士恤民葺文廟置書籍修學志建占鰲閣縣例照米編差餘米自肥勸編差之後餘米盡蠲士民頌之

萍鄉志

黃洽中長沙人萬厯進士知宜春縣清廉和惠一意恤民歲荒悉心賑救開倉借貸貧生各給穀一石令秋間自買還倉建文昌閣於縣學左擢刑部主事

宜春志

畢懋良字見素歙縣人萬歷進士知萬載縣邑接壤瀏陽民苦公賦多逋逃懋良捐貲負給牛種墾荒民稍稍集念南糧解戶賠累懋良僉南布並解謂所發布價可營息以此均其役他若立社倉革火耗裁樣鹽禁差船課士修學皆善政也居官淡泊自奉惟日食豆粥邑諸生張紹詩云買牛給種桑麻盛捐俸空囊豆粥香蓋實錄云擢南吏部主事歷官工部左侍郎萬載志

黃鳴喬字啟融莆田人萬歷進士知袁州清心惠政治  
行兼優修郡學濬李渠表黃太常廟塋百廢具舉尤  
念素賦加浮重修郡志具列誤報始末陞河南副使  
府志

王隆德烏程人萬歷進士任袁州推官有才識時撫按  
行部以條鞭之外復有值櫃收銀南糧民解為里甲  
困擾及衙門供應取辦地方民苦之檄隆德與建昌  
推官陸鍵條議量加四差一切錢糧俱官解僉點吏



書值櫃經收及各公署損壞什物置辦俱官給修補  
供應夫馬悉給驛傳不許假借私派里甲請著為令

一時稱便

同上

倫應祥南海人萬厯間由鄉貢任萬載縣政尚嚴明時  
值洪水米價騰貴應祥便宜行事即將南米發糶以  
本縣穀救本縣民有强豪搬運射利者即置之法饑  
民以是得甦

萬載志

姚繼舜號虞廷萬厯間由鄉貢任萬載縣歲大饑捐俸

設粥濟之疫痢交作施藥全活甚衆葺學宮修預備  
倉建康樂橋書一聯於門曰鄉井有田宜早種縣庭  
無事莫頻來民至今稱之陞工部主事

安志

陳瓚漳浦人天啓五年進士崇禎十年為素州推官拒  
楚賊有功屢遷湖廣右參議十六年張獻忠陷長沙  
被執不屈死

白志

丁聖時字墨巖巴陵人由進士崇禎戊寅為素州推官  
盡心讞決風采凜然嘗申革宜春縣私議幫解建喝

斷關以遏萍衝郡人德之

安志

韋明傑字叔萬烏程人崇禎進士任萬載縣質直明決  
愛士恤民時值增餉加派民不堪命明傑申請少減  
纂修邑志著有籲天四議康樂民隱六冊聽雨齋集  
公署文廟城隍廟鳳真閣皆捐俸重修之

萬載志

陸天祚浙江人崇禎十五年任萍鄉主簿明年冬張獻  
忠陷萍鄉賊首張化龍執之使降天祚曰主簿降無  
益於西府願請死賊怒遂遇害

萍鄉志

李時興號念劬福清人由舉人歷臨江同知改袁州攝  
府事乙酉七月南昌已降時興城守無何守將蒲纓  
兵潰湖廣援將黃朝宣五營亦譟歸時興知不能守  
自縊於萍鄉官舍一僕亦隨死

白志

國朝

吳南岱字泰巖武進人順治己丑進士十年以員外郎  
出知袁州袁郡苦浮糧時江西右布政使莊應會請  
汰袁瑞浮糧下戶部議南岱適膺命未出都毅然請

勅撫臣確查巡撫蔡士英特疏卒汰袁州浮糧十萬  
石甦三百年重困南岱與有力焉郡方凋敝力為撫  
循城池學校津梁靡不修舉續修袁州府志有公暇  
草等書行世

安志

劉鋹號木菴祁州人由拔貢順治六年為袁州同知郡  
初恢復環城皆兵署鎮貪橫困索諸紳士動輒械繫  
鋹與推官王延禔力為排解之視府篆益加意保釐  
剔蠹戢兵申繳文武各臺司市米金散鹽檄尤屬吏

所難

同上

王忻號燕皇章丘人順治二年令宜春縣時軍興旁午  
鎮兵驕悍時喧噪入署忻善其調劑浮糧一節時於  
臺司前縷悉請命卒邀撫藩入告十年改選去官舟  
次新喻遇兵害

宜春志

張浩字鶴胎無錫人由拔貢順治十七年知宜春縣廉  
明能斷兵燹後圖籍焚燬田糧收除朦混浩立局按  
查令民各自呈報賦稅得實嗣是官無漏徵民有定


賦同上

吳自肅字在公海豐人康熙甲辰進士十二年任萬載知縣時湖南告變長沙失守人情洶洶大兵駐紮郡守檄自肅至郡助辦軍需時議開濠自肅以勞民動衆力止之邑兩遭兵陷民亡田荒自肅繪圖詳報前後至數萬言陞內閣中書

萬載志

馬光遠遼陽人康熙十五年同知袁州時棚寇肆虐光遠募鄉勇諭以忠義擒巨魁復冒暑沿山谷搜餘黨

遘疾卒素民哀之府志



江西通志卷六十